


辛巳
興已
禦泣
侮蘄
錄錄



叢書集成
初編

主編者
王雲五

商務印書館發行



錄 駟 泣 巳 辛



3 0646 5809 3

編 窠 與 趙

辛巳泣薪錄

本館據指海本排
印初編各叢書僅
有此本

083
112
2:3895

四庫全書提要

辛巳泣蘄錄一卷。宋趙與峩撰。與峩宗室子。官蘄州司理權通判事。寧宗嘉定十四年。金兵圍蘄州。與峩偕郡守李誠之拒守。時朝命權殿前司職事馮楫將兵應援。楫逗遛不進。誠之等竭力捍禦。凡二十五日而城陷。誠之及其僚佐家屬皆死之。與峩全家十五人亦並歿於難。僅以身免。其後事定。乃爲是錄。具詳被兵始末。同時與難諸人。朝廷褒贈。誠之等勘狀告詞。一一備錄。按與峩宋史李誠之傳作與裕。蓋與峩轉爲裕。因訛爲裕。又載與峩率民兵百餘人奪關外出云云。與是編所言單身出城。及於積屍中死而復活。夜半奔從南門之語。俱有異同。且十五人作六十人。其數亦不相合。疑十五人之數。當以自敘爲據。其奪關外出。則自敘諱之也。

辛巳泣蘄錄

宋

趙



嘉定十有四年歲在辛巳二月九日蘄州得隨州太守許都統國初三日牒云有探報人言金賊日聚人馬在息州意欲擁衆一道渡河打撈時聞大金見欠三月糧草諸軍只給十日口食前來我界宜多措置以爲隄防之計初十日得張都統常王都統辛報與許隨州所報一同本州得報之後人皆曰虜未必深入是日太守李國錄誠之通判秦鉅會屬官集議於安民堂出示諸處報牒太守語察屬曰五關可恃否教授阮希甫曰或者之議爲不可恃似聞尙有私小路槎塞不盡與襄曰虜人多不由關隘亦不特有私小路而已但有山脚可登之處彼盡能擁騎而上知縣林榮曰是如此又云關內有取德安府從黃陂一路自可長驅使虜知之亦不由關隘而進也倅車曰何憲云五關決然可恃內郡可以臥治太守笑曰且看秦倅又曰宜速差人前去硬探仍多支錢與其去庶幾着心太守曰然十一日差兵士朱椿等七名硬探每名支銅錢會十千十二日使府帖防城庫排設弓箭應千軍器是時與襄提督防城庫躬下庫點檢共差兵士五十人入庫內點檢得弓箭有七十萬弩箭有三十五萬有奇是日差弓匠打砸弓力又點檢有划車弩八十五座箭約五萬隻當申州添差其日亦准制司催造紙兜盔一千副本州實自去年十一月造至二月十五日迭此數十三日使帖行下防城庫點鐵甲大小共有五百副兜盔五百二十副長鎗五百條麻劊一百五十柄是日分俵上城戰樓內安頓以備不測是日委四門官兵緝捉奸細

十四日州牒差濠寨吉亨劉成就五通廟內添造五梢殿五座旋風殿十座又牒催造木弩五百張同日教授阮希甫狀申集在學士射二百二十人乞支給弓箭是日出五萬二千隻以給射士上城準備策十五日探報申虜賊初九日已渡河大約人馬數多時守倅知縣俱出廣教寺勸農未幾聞衙探報知府吃酒不了就呼專行司手分牒安慶府及申制置司催會合逆遇仍備憲司牒下諸縣催發民兵上關捍禦太守歸州治遣虞兵傳語府判諸寮屬各請議事首言虜賊已渡淮河在我不可不爲備應同官有能諳曉守城事務者各竭智獻謀以預爲之備無待臨時阮教授拉與襄與林知縣甯主簿進稟曰希甫輩無過一書生耳若有大軍在此屯駐相與連籌如鞍馬一事却非素習太守笑曰吾輩何事鞍馬亦要相與畫策太守又曰嚴監轄剛中曾守盱眙必知守城之策又云蘄水董尉每每見其以弓馬自矜府教授阮希甫答曰董乃名將之後必熟陣伍之事且本州素無重兵萬一虜賊衝突而至誰充主將調遣若申制司何事便到眼前此猶利害之急於是太守檄二公入州同共措置邊防事太守又曰誠之知鄂之日寇犯隨州亦嘗措置邊防粗知其略彼時家人先有守死之義今守蘄水三載兩遇寇至頭顱七十書生輩已兩任邊守有何不得正當駸駸入土之年所欠惟一死耳他無所戀況誠之屢有丐祠之請亦只是求一死所萬一寇至只得與同官死守十六日本州牒黃梅廣濟縣各起民兵一半上州捍禦同日王太尉辛報十三日虜人蟻聚關下除已將帶人馬前去迎敵外牒州嚴作隄備十七日有十一日所差硬探朱椿回申十四日黃土等關已爲賊虜所破聞諸關失守萬弩手與張棠等軍已潰散至麻城同日准提刑司十三日牒催蘄水蘄春民兵上關守禦是日諸縣亦節次發到民兵即便起發上關同日申

樞密院與諸司催撥兵策應。黃州日午同官過廳。倅車偶與同官云。今日遣承局馬飛通相君書。力乞撥兵。及言蘄城利便事。已約三月十一二間到。後來又云得相君書報云。示及利便。深見拳拳體國之誠。武車到郡之初。亦嘗語太守與同官曰。無視蘄春爲內地。常宜多方措置備禦之具。又云有備無患。如脩城聚糧。團結民兵。招填廂禁軍。亦不可不留意。每旬教閱市兵。宜放房地等錢。蓋市兵教閱。則一日營生俱廢。官司既無所給。若免其房地錢。庶幾補其一日之勞。太守亦從倅車之請。自此立以爲例。同日遞鋪遞到兼黃州僉廳廣濟張箒震發十六日午時書報云。前日劄探所報虜賊此來。皆不持糧。其意必在速戰。今光州申到一面關集義甲入城。想是自見其頭重。故爲閉門不出之計。虜既無糧。必不頓突堅城之下。其勢只是推擁衆直犯關隘。關上人數不爲不多。但未保其皆能死守。提刑見此辦行。親自上關督戰。在使州亦須爲守城之備。欲乞差謹信得托人來此劄探。同日出弩火藥箭七千隻。弓火藥箭一萬隻。蒺藜火礮三千隻。皮大礮二萬隻。分五十三座戰樓。準備不測。又給木桿鐵鎗一千條。紙兜傘一千副。紙軟纏五百副。俵散土城守禦軍民。并發鐵菱角三十籠。下城鎮撒以防虜賊衝突。十八日准提刑司十七日牒報。虜賊已抵蘄城。同日未時。李國錄先生回廣濟。張箒震發書云。誠之昨日遞中辱書。乃十六日午時。備悉不持糧之說。隨州報來甚詳。想必是如此。但光州旣爲虜人牽制。閉門不敢出。今堂堂而來。據報探人節節報來。皆言虜已打破關。在關裏劄寨。今奔避百姓源源不絕。聞關上民兵皆潰散。大軍亦潰者。果然否。張軍帥今在何許。更不見消息。憲使督戰之說甚好。但不知過時住否。此間無一可靠。民兵已發一半。羅田又不可抽起。今只有蘄春民兵一千人。與廂禁軍。又無人可使。殊爲可憂。今只得多鳩集招收。急

爲區處有所聞。望時時見報。昨日已遣人往黃州抄劄動息。不知會申制司求援否。彼中若無兵。自可急遣來此協力。倉卒不暇作字。幸台照。至晚得廣濟陳知縣允迪所錄張簿之書。大抵與十七日書一同。是日秦倅會同官偶云。去年二月之官。道由四祖。以長學生未得歸侍。嘗許水陸一會。約今歲勸耕日親詣山還養。既聞虜已過淮。不及親往。若遣小學生去。今恐或者謂鉅托名遣子先遁。未免且止。令人吏葉茂往代拜。鉅且留此。與諸同官熟議守城之策。是日太守與同官皆着綠布袍。乘騎出入。獨秦倅著白布袍。至午守倅而下各上城。及下防城庫點檢防城器具。又委司法趙善腴團結市兵。是日蘄水董尉至。言尉司差人硬探。聞金人已到麻城。蘄水縣官擬欲移治。太守答曰。蘄水既無城壁。不應使縣官徒手向前。且看事勢如何。却又區處。又言近准憲司差委戡前去點檢諸關。今錄守關人數。便見無人可守。如黃土關只有百五十人。白沙關有三百人。大城關有百七十人。脩繕關有二百五十人。木陡關有九十人。關之相去有百五十里。或七十里。或百里者。歷說五關之不可守。又況首尾之不相應耶。又曰。戡之奔馳勞瘁異常。點關之時。虜已渡河。昨晚方奔走到家。尙未與官長言五關之事。被檄此來。就挈妻孥已抵郡矣。李亦不暇。問曰。仕宦於蘄。安知有此等事。同日監轄嚴剛中繼被檄至。使帖委同充守禦局官。亦有利害數事。失記其實。與襄曰。蘄州城池四門皆無慮。獨有師姑潭一壩。虜人一至。必來窺伺。何故。外河乃是沙溪。大雨之來。水漲賊不可渡。雨退無過一二尺水。是人可涉。李守曰。此處誠之亦正慮此。續後選得諳曉人陳興汪士等。專一措置捍禦。十九日探報人申。十七日虜分兵到團風。十八日晚。番人已圍黃州。同日本州守倅差洪春十人爲硬探。各支官會十道通判稿添賞錢二十貫。省至晚兩名先回報。賊已至蘄水。是

日阮教授上守城利害十事。並失記其實。二十日洪春申自蘄水來云。虜賊十七日已燒上巴河十八日賊見在下巴河。又申十九日至蘄水。望見虜賊先燒神光觀。二十日燒蘄水縣。是日上下巴河百姓擁併奔竄。擣挾子入本州城。哭聲震天。同日早李國錄先生再與張簿書云。聞虜賊打破關隘。官軍既皆潰散。張軍帥亦不知所在。或言重傷。不知果何如。聞已被遊騎燒了團風。黃州已燒城外屋宇。事勢急迫如此。奈何。最是上巴河路擺鋪不通。消息隔絕。奈何。不知憲使有何處置。更不暇作書。又不知麻城今如何。所傳皆不一。千萬速報。前所遣人乃不卽往。今再遣人往抄錄所報事宜。草草布此。幸台照。同日造大麻搭五百四十副。竹唧筒一千一百副。分五十四座戰樓準備。又埋金汁鍋百二十隻於四隅。及五隅官排門。率百姓水缸二百隻。上城貯水。以防不測。至晚有蘄春管下董應能、徐彬、徐杞、黃思明等團結義甲二千人於北門外。防托。彼時惜無人充主將。與之調發。應敵。後來四城被賊圍閉。錢米不給。終爲虜賊擁衆衝散。同日太守李國錄誠之。通判秦朝請鉅。置軍將於西門。袁學錄家。此處督戰近城。充本州都統轄民兵事。兼淮西制置司。僉應行司公事。督戰軍馬。趙與。襄置軍帳於袁學錄後園亭子。此處近受敵。西門提督民市兵。趙司法善。阮教授。阮希甫。江州統領陳興。充南隅守禦官。蘄春知縣林忠。新鄂州武昌酒稅安忠。訓元恭。蘄州蘄水縣尉董忠。翊戡。充北隅守禦官。蘄口監轄嚴承直。剛中。主簿寧迪。功時。鳳監廟趙保。義汝。寄。充東隅守禦官。安豐軍統領官孫中。訓練官曹全。本州監廟李俊。充西隅守禦官。都監趙脩。武師瑄。守東門。駐泊張武翼。廣守北門。監押溫保。義守西門。監務梅成。忠。察守南門。判官趙迪。功。汝。標。充錢糧官。監嘉興府新城酒稅。姜成。忠。應春。充防城庫受給官。監廟秦武。德。安。上進武副尉。林安。仁。進武。

校尉王明進武校尉吳宗政指使鄭保義俊充東隅戰樓守禦官進武校尉王大明監廟劉保義忱指使錢成忠廣充北隅戰樓守禦官三湖巡檢雍承信顯新宿松主簿梅迪功必勝監廟陳成忠師問充西隅戰樓守禦官巡檢李鈞充帳前佩印官同日委守禦官已下監籠籬牌本州九里三十六步之城共一千三百女頭率廂禁軍民兵市兵共有七百人每人管女頭兩座同日牒廣濟黃梅縣民兵四百人入城守禦餘各留縣防護鄉井晚報新虜已至分流鋪田家山諸鋪已捲逸角不通約虜賊有馬騎三十餘步軍三百餘人守倅語諸寮曰虜賊不多宜遣兵以遏其來路於是抽守禦官統領官李浩立白旗於州門如願前去迎敵虜賊者立於旗下當與厚賞如生擒頭目賞錢一千貫給承信郎公據一道事定奏功斫到首級及奪到軍器錢一百貫賞官三資人給以軟纏一副隨其武藝給以弓箭鎗刀長斧一日之間有禁軍一百人民市兵二百人茶商弓手會等五十人願效死戰每人給官會五千乾糧一口袋與襲親自監散各先喝官三資以激其勇人心奮發願行二十一日太守委監轄嚴剛中借補迪功郎戴楸充督戰官進勇副尉李浩充統領進義校尉王文明進義校尉鄧宗充正將是日早出軍迎敵至橫槎橋十里迎見虜之遊騎約三百餘人正將鄧宗教頭張富等爲先鋒直入虜陣自辰時鏖戰至午虜見我軍勇衆難支奔走退遁我軍追襲殺死番軍數十人奪到驢一頭皮甲數副弓箭鎗刀等張富等一十三名傷重死於陣前監轄嚴剛中抽回人馬入城急報太守曰虜賊回退已報大隊前來宜急守城壁於是太守亟告僚屬分管地分遂拽吊橋關閉城門同日有張常守關兵將潰散前來獨有承信郎統領江士旺將官陳興沈祚將帶一百三十人入城情愿乞守城壁太守云既是潰兵此豈足托倅車與與襲同稟太守

曰。關隘獨有一門軍。兵力單弱。寡不敵衆。無怪其潰。今我衆雖寡。幸有城壁。虜在危城。我處甚安。正要此輩共與堅守。彼之棄主將之罪。已不可恕。今能爲我守城。他日功過可以相補。太守然其請。於是分布諸隅。各給以生券。戒以守隅。盡俯首聽命。願以死報。同日廂禁軍民市兵。各日支錢一百文。米二升半。太守親詣城撫諭。不拘上下。應守城人。每名各犒銅會一貫。酒一升。至晚發嚴。守城人唱連珠。喏聲齊。氣象甚壯。倅車曰。守城人聲勢整齊如此。金賊知吾守城有人。疑惑未必敢進。府教授阮希甫曰。賊如何敢便輕易。若到城下。且遣人相視我城前後敢進。二十二日。安四門礮座。司法趙善臚。抽市之單丁者六百人。分拽礮索。司法申乞照市兵例。人給米二升。錢二百。太守提其中。同日添委江州統領江士旺。專一守西北圍樓。添將官陳興。同教授阮希甫守南門。添將官沈祚。同知縣林榮守北門。添訓練官陳信守西門圍樓。知府李國錄帖委安豐軍民定統領官孫中充都彈壓。守城人兵。是日亦准制置司劄子行下。取出孫中一行十五人守城。孫中時因安豐汪倅摺拾借兌生券錢事。送本州根勘。江士旺領兵百餘人。斫鹿角木。槎塞西北圍樓下。師姑潭壩上。及於西北樓下。釘絆馬椿。人工未就。是日望樓子陳軍報虜賊已擁衆至西門外廣教寺山。望城崗山腰。劄塞數百處。耀旗俯視我城壁。牧馬二千餘匹於山下。但州城尙隔河。虜未敢近。是夜金賊約有千餘寨。每寨燒火一堆。映照城中。列炬不可勝計。擺狗鋪。其聲如狗吠。連接巡邏徹曉。是夜諸隅守禦官各宿城上。二十三日。本州西門方始清野。時北門守禦林知縣榮甲。有青山鄉學生董應能。總首徐彬等。捕獲奸細盧四名。立供。元係壽州下蔡縣人氏。自嘉定二年。招安過淮。分居蘄州新寨。有頭目人張奇八郎。常令我與其家張二。張三。韓四。王小乙等。歸北界報信。每一次歸去。做造

草鞋一擔。歸大金界貨賣。每月仍舊在蘄州冒請錢米。盡是張奇收管。盧四仍舊往番界歸德府居住。種田爲活。今年正月。蒙王萬戶差人前來。喚盧四等爲鄉道官。初九日。盧四等同大隊人馬。渡淮前來。打虜要打廬城。迺遇至蘄黃等州。已先令張二韓四。於二十一日。從東門浮橋入城。與張奇八郎相約。二十四日。於新寨放火爲號。與左監軍等內外相應。從西北團樓打入城中。阮教授出示州教諭。洪樞子所說。又詳與襄與阮教授曰。急稟知守倅。太守聞知。急帖四兵官與緝捕多方搜捉。今奸細已入在城內。萬一尋不着。何以爲策。是夜數處火發。隨即撲滅。又引示總首洪樞。勒盧四再供韓四張三面貌長短。衣服色號。及年甲。方得端的。阮教授曰。既得其實。萬一解來。爲虜所奪。其爲害不淺。不如就委洪樞梟其首級。前來令衆無過一斬矣。本州雖知奸細分明。終日不獲。與襄又與教授設謀。請司法趙善臆密喚頭目人張奇。具歸正姓名。誘以守城之事。其奸細三名者。皆在張奇所具之數。與襄又語阮教授曰。奸細三名。已在吾掌握中矣。阮教曰。甚好。既得之。此正騎虎之勢。宜急下脚手。不然來日事變。我輩先爲魚肉矣。於是點留三名充帳前使喚。餘盡令歸寨聽候。呼叫分撥守城。既去。生擒三名。申解使州送獄。一勘而成。所言與盧立無異。太守以張奇久在吾郡。初亦未信其果有叛逆之心。再送州院。人無異詞。又據弓會等人喋喋告說。其日與李浩人馬前去與虜迎敵。時張奇亦預弓會名數。同往。彼時張奇虛放一箭。竄入虜隊。亦疑其有私約。州府聞之。卽指揮速卽根勘。此一項情節。由張奇供出。其日果會入虜隊中。約二十四日。用草鞋戳于鎗頭上爲號。令番賊打入城中。又供四十八名同謀來歷分明。卽付與襄先將三名斬於市曹。人心稱快。一面委司法趙善臆。領七十餘卒。擒同黨四十八名。所供無異。是夜就請司法抄估四十九家之囊。

篋。有如燄硝流黃弓箭鎗刀。家家有備。是日守城人尙未披帶。而張奇等身已著軟纏乾糧在腰。獨張奇之家。有黑旗十餘面。及有斬黃安慶鄂州興國武昌等城圖。又有自關外斬黃江州諸處里數。又有大金王萬戶等。去年十一月往來書信。則知歸正遺類。皆不宜置之邊面州軍。所可慮者不止一州。是夜則勦盡其餘黨。倅車又曰城外諸寺尙多此輩。不亟除。爲害不淺。乃卽告示各鄉總首。盡行勦除。據總首申來施行間。而太平半已先入虜隊。獨所存者婦女而已。當日雨作溪水泛漲。時有數騎往來沙河兩岸。若相視措置過溪之意。是夜賊仍舊札寨于廣教一帶。每寨亦各燒火一堆。直到天明。列炬不滅。前夜金賊聲連相接。爲狗吠之聲。聞之諸卒曰。此正所謂擺狗鋪也。太守自此夜宿于袁學錄大廳。日逐視事於此。並不曾回衙。與寢宿于西樓。阮教宿于南樓。林知縣宿于北樓。寧主簿嚴監轄宿于東樓。二十四日。虜賊擁衆下山。直至下河渡。呼叫張奇八郎如何不出來。莫誤了我。太守登城撫諭。又親聞虜賊呼叫張奇八郎。始知所斬無愧。是日有馬騎數百匹下河。試水之深淺。至午。又有人同鄉總首康謙狀申。迎見虜賊殺死番軍。及奪得衣甲等。有北塔寺歸正人引前被徐彬已殺死。委是大獲勝捷。是日廣濟縣民兵二百人。打入城。分在北隅守禦。至午時。雨大作。有一番人手執雨傘。身披篋衣。自上河來。沿濠巡視。將迫我城。呼亦不見應。孫中以箭射之。亦不顧。低頭而走。從巴茅山路而去。此是間探無疑。同日又斬張奇等家屬。是日州府告示。家家各點夜燈。以防奸細。司法申連日以虜寇入境。百姓皇皇。無暇營生。日來油價頗貴。小家點燈一盞。至天明。非一二百錢而不可。申乞出榜市曹。放房地錢。庶貧者以地錢爲買油之助。太守從之。二十五日。虜賊用隔河人家門扇爲挨牌。列於沙河畔。扛枋及小桁條。不記其數。前來搭橋。與寢准。

本府下令速遣陳興將帶弓弩手百三十人與商聶友中等搶叉手自南門對岸以迎之。阮教授同與裘督戰頃刻之間虜賊下河釘樁絞縛橋道被我軍射殺不計其數。於是又以門扇護身入水打樁其箭如雨而不顧性命我軍又以火箭射之方燄之頃又被賊以水撲滅箭鏖無所施巧終不敵其衆多。河之北岸有所謂銀牌郎金牌郎執刀斧以脅造筏之虜不向前者斫之至晚虜大擄擁衆絞筏已成太守與僚屬曰不宜聽其造成亟遣兵以燒之於是又遣陳興等一百三十人佐以茶商弓手百餘人是夜再賈勇而前被我軍弓箭射殺及中傷落水者不計其數仍施火箭燒斷道頭抵暮而歸太守喝轉各人兩官二十六日溪水漸退賊擁衆仍前不畏弓弩再搭橋道過於西門角水陸寺前搭立硬寨巡視城壕又開掘水陸港口放泄壕水有番人以索來試水或用水竿而探水者皆被我軍射退虜賊懼羽箭之不可近於所掘港上橫以枋木如排算子之狀遮護矢石所掘之人藏身於下射中者挾之歸寨既退復來須臾圍燒我戰樓又被我軍以竹唧筒作水箭噴滅其火賊發喊而退諸軍曰此虜賊瞰城也同日太守批牌傳令應在城守禦官如遇虜賊前來各隅所管地分攻打城壁須管盡忠竭力隨機應變務在勦絕毋致墮落虜賊奸計續又批銀牌傳令應在城守禦者各賞五官至夜守城之人奔趨上城不計其數各乞預名。人皆以保妻子爲念人心賈勇至晚肅然孫中發嚴一罷氣象愈壯於前是夜遣獄子李信催援兵及催安慶民兵同日虜分二百餘寨于嚴家山左右每寨亦燒火一堆如列炬焉是日番賊馬步軍盡過西一帶村落打擄至曉虜人擄得牛隻約五百餘頭每一牛各有一婦人牽之。二十七日番賊擁三千餘人併力東南圍樓對過侯家潭開掘水港所執鋤鍬之人皆被虜賊用索串其髻者十餘人阮教授飛告

急。太守當遣其子二機宜士元隨與襲。同府判領帶弓弩手五十餘人直趨東南圍樓下策應。阮教授又調統領江士旺陳興等併力攻打。當有銀牌郎番軍頭目一人用氈簾遮護。直至港上督戰用工。被將官陳興射中耳門倒斃。隨見番軍五六人扶策回去。其餘射殺中傷不計其數。須臾退走。申州奏捷。知府通判。繼而親上城撫諭。又各喝犒射人三資。而陳興特喝五資。支賞錢三十貫。是日金人不往掘泄水陸港口。至夜虜各歸寨。知府令與襲召募茶商民兵有膽勇者。燒其所排枋木。填其所掘水港。須臾陳興等有五十人各願請行。人各先支犒賞。至二鼓下城渡濠。奪得遮牌無數。燒其枋木。填其所掘之港。虜賊各潰。我兵殺死番軍數人。其餘寨雖知而不敢動。但暗發鞭箭而已。我軍亦無所傷。是日與襲調發北門外義甲董應龍等三百夫。生擒番賊七人。斫到首級十枚。太守各喝賞三官錢五百貫。同日太守又遣人齎公文求援。是日又與阮教授寧主簿撰檄。大檄義甲民兵。內外勦除虜賊。檄曰。蠢茲金虜。竊入五關。眷我斬城。獨當一面。雖城塹有高深之險。而將士宣捍禦之勞。然念五縣英豪。四方忠義。久被朝家涵濡之澤。豈忘州郡攻圍之憂。爰寫忠誠。用咨英傑。矧知不道之寇。大是無名之師。以吾民恩交義結之心。相爲響應。如彼衆偷合苟從之勢。立見勦除。宜各殫所蘊之長。當共赴有爲之會。或斬將搴旗。而乘其始至。或斫營破柵。而掩其不虞。況今雨澤霽沱。河流漲溢。用天時而遏其遊騎。因地利而斷彼歸師。功名皆在於斯。須機會宜乘於頃刻。靜胡塵而安邊境。倘各効于虜功。申制府而奏朝廷。必厚加于旌賞。故茲檄諭。各請知悉。同日西門士庶各出錢爲犒軍之用。一日之頃。約五千貫。解赴帳前。二十八日虜賊復來開掘水陸港。我軍愈射而愈不退。又別運枋木前來。我軍又以礮石擊打掘港之賊。虜望礮起。則鳴鑼以報。餘黨

賊聞鏗響，皆避于枋木之下。多方設計，無所施巧。是日又見賊衆各斫竹篠，束縛稻稈，四散堆積，與窆等逆料，其必是堆填河底。飛申本州，知府批令多備火箭以待之。至午時，但見四面號煙三條直衝而上。又見東門守禦官寧主簿嚴監轄報虜賊拽人馬過東嶽廟，左右交鋒。至申時，望樓子陳富報，番人牽馬三四匹，從下河所絞橋上過。馬點蹄而行，虜賊有扶策而歸者，有帶血者。四門已閉，但不知與何處援兵交鋒。須臾有百姓兩人，衣不蓋體，赴水渡河，至城脚下，稱安慶民兵前來策應。至嶽廟，迎見番賊，被番賊殺死，不計其數。有下口統領與催援兵人李信，俱被虜賊生禽。方知安慶民兵已至而不進之因。一更盡，東門報有焦大尉遣兵硬探到，時有將官單不記名等二十人，自來家亭、伍百寺、劉公河、洗馬灘、桃樹山路來，吊上守城。每名犒設銅會一十貫，酒二升，日支生券。是日番賊擁衆前來，燒毀四門吊橋。司法趙善腴領市兵與孫中陳興等往來射賊，各退遁。同日知府又撫諭百姓各自安業營生。同日東南北門各斂錢共三十貫，解發至太守帳前犒軍。當日太守傳牌報四門如各隅有獲捷之人，請徑自鳴賞錢，却申來支撥。是日虜賊騎圍城數重。二十九日，知府告示諸隅堆積火把，多置金汁鍋，仍告示百姓般傳磚石及壓街石與樑柱，列在一千三百女頭之上，以爲備城槓木之用。人心奮發，頃刻而辦。與窆與諸隅守禦官兵上城提督，晝夜巡警，未嘗解甲。又備火監松明以照城脚。至晚，又有斬水被擄婦人，走回。歷言虜賊在廣教寺已造雲梯數百張，又造牛皮洞子二三箇，造砲三十座。稱說初四日定來打城。是日虜賊百餘人，燒師姑潭壩上鹿角。城上以硬弩五十人射之。又調發江士旺孫中陳興陳信李斌等將，帶百五十人直下城以搶之。殺死番領一人，番賊三十餘人。陳信生擒一人，吊上城。而賊已傷重氣絕身死，斫其首級，令

于城上奪得銅印一顆。印文都統所洪字印。其印背云。興定五年正月。行官禮部造。收兵歸城。太守給官券各名十千。又喝官三資。委是勝捷。是日日本州遣帳前佩官獨木巡檢李鈞。帶領銅會一萬貫。往黃梅廣濟縣。准備給犒援兵。同日虜賊方安立砲座于沙河內。望見番賊往來經營之狀。三十日虜賊又造上河橋。運竹把擁併而來。堆塚初城壕一所。餘地皆我百姓婦人搬運。聞是擄到黃州。蘄水。麻城。上下巴河之民。般運不絕。其日有北門外文頓坊稅戶黃思名等。又捕獲番人秦順。據供係潞州人。油麩行爲活。鄧王起我爲軍。日支麥二升。有妻一人。子一人在家。各請官中麥二升。隨逐左監軍人馬前來打擄。自黃州分正軍三萬人來打蘄州。本意只來打巴州便回。卽巴河也。實有蘄州歸附人盧立。與張奇張三韓四說來打蘄州。不妨彼處無大軍守城。只有民兵四五百人。所以遣我前來。又供稱左監軍未到。未敢攻城。等監軍到來方攻城壁。監軍完顏鼎。約黃千戶。耶律千戶。共有三萬人來。又有毛克攻下五人千戶人馬三千人。鄧王指揮許半月打擄。即便收兵。次日將秦順斬於市曹。押出之際。口說大金鄧王無道。連年用兵。使我兄弟五人。皆死於軍。歌唱自如。曰。生爲潞州人。死作蘄春鬼。晚有蘄水鄉民黃小三妻阿李被擄。拘留廣教寺。凡十有餘日。脫身遁歸。至北門城脚下。當用索吊其上城。具道虜人有左監軍完顏鼎。有五萬人馬。見在寺造砲石。雲梯。牛皮洞子。約初四日攻城。與二十九日。蘄水被擄婦人。所言一同。三月一日辰時。望樓子兵士陳富報。虜賊擁衆前來圍西門。當調發孫中江士旺陳興等。準備弩手以待之。至午時。賊擁過吊橋。被我軍射死者不計其數。及西之皂角樹下。一衣長甲軍。坐於交椅之上。方開弓弩欲射我。戰樓上人。被孫中一箭射倒在地。金人擁前拖去。又被我軍亂箭射中數人。奔走前去。至午。節次探得金。

人拽馬騎千餘匹。過南門。劊寨擺過。北直至廣教山。望城崗。後橫槎橋。南至南禪寺。東至嶽廟。西至金家渡。嚴家山。度其姦計。一則把截以防東來策應之師。是日太守同倅車。詣諸廟拈香。祈保城壁。同日虜人於西門外張鑑屋地上。造望城樓一座。窺視我城內虛實。與襲見賊之上樓。窺視我城中之兵勢。遂於四隅抽差。又手五百人。又以雜婦女小兒。多張旗幟。拽作數隊。爲伏兵。遠城耀金賊。委兩將官騎馬以統之。其賊望樓之兵。果下樓以亟報虜人。初二日有斬水百姓王七二。自北門赴水渡河。稱被擄去。金人放歸。口稱令我齋書。請本州受降。知縣林榮吊其上城。解至制幹行司。與襲卽請稟太守曰。度其書無過辱國之語。不必開看。其王七二乃吾民。苟活偷生。爲虜將持書以辱吾國。太守令卽斬之於市曹。是日羽箭射辱國之書數十紙。太守以銀牌批諭守禦官。凡有此書。並不許開看。仰仍舊射還金賊。違者依軍令行。遣射還之時。諸軍大罵賊黨云。吾乃大國。不受此書。云汝金國旣爲韃靼殘破。所守河南數郡而已。若非汝以金帛子女。以博安靖。安至今日。我本朝好生惡殺。不欲遣兵殺死。鄧王今不自保殘喘。輒敢與兵前來。是自取其禍也。今聞汝欠三月之糧。遣兵前來打擄兩郡。城外旣爲汝等蹂踐。擄掠蕩盡。若能收兵回汝金國。我亦不遣兵追襲。況蘄州乃牛角之地。有來路無出路。汝等萬一更猖獗無狀。我定遣兵百萬。分路揮截。使汝匹馬隻輪不反。毋貽後悔。賊皆俛首不答。是日與襲又撰檄。以招降金賊。其檄曰。洪惟我朝。每以兼愛南北爲意。凡待鄰境。惟有不殺生靈之心。祖宗畀付。第第相承。社稷靈長。往往賴此。在今日之對壘。實彼國之造端。汝主不自省愆。肆爲不道。外則困於韃靼。而懷遷怒於我之恨。內則失其臣民。而起歸罪於我之私。雖竊據於汴京。尙有稽於天討。蓋逆順曲直。在我有定論。而存亡成敗。聽彼之自爲。何

期反肆於侵陵。是用載嚴於備守。城壁素堅。而糗糧素具。士卒素練。而器械素積。援兵蟻聚而來。義士蜂屯而集。各揚威武。盡奮精忠。我師旣運於戈矛。彼衆必爲之齧粉。是用仰承厚德。撫示招安。投降歸順。則旌賞之必加。潛遁竊逃。卽追擊之勿襲。苟執迷而莫悟。定勦戮以無餘。幸思去就之宜。毋蹈翦除之悔。故茲檄諭。想宜昭悉。初三日。番賊擁衆般擡雲梯砲座攻城器具。前來攻打城壁。是日事多。吏輩分頭督戰。應有申狀。一切略去。祇用片紙親寫飛申使府。與竄急以片紙飛報本州。太守親批報云。如賊用雲梯登城。宜造三鬚勾。用藤索拋搭近前。施矢石者。自施矢石。又急用長斧數十柄。準備斫其雲梯。但要脚等急速爲上。則賊不可得而近也。誠之上覆司理兄。與竄卽點發將官江士旺。陳興孫中。告諭官兵。一如知府批諭之策。射殺番軍無數。是夜又有茶商軍三十人。請出劫寨。當夜殺死番軍八人。奪得番槍二十條。番刀七把。大小氈十五副。皮牌五六面。弓四把。是夜正望援兵不來。至二更有百姓蔡汝霖二人。齎權司張亨白旗前來。稱有急脚於東門磨旗爲號。甚慰滿城懸望之切。本州逐日遣人磨權司張亨旗號等候。並無消息。是日秦倅率百姓詣五通廟祭陰兵。倅車曰。鉅自虜人圍城。一家食素已半月矣。小兒子事斗尤虔。每夜朝禮誦經。亦只爲一城生靈與骨肉之故。初四日。金人擁衆。皆以白布包頭。前來西北團樓。號哭我城。與竄卽遵用兵法。殺狗一隻。去其心肝。以所奪番笠番氈。與狗披帶。用長槍戳起。以厭攘之。彼哭我樂。又呼妓弟着紅衣。動細樂於戰棚上。金賊自午至夜。哭聲不住。其日西南角番賊。亦擁衆於城外。開掘承陸寺後河水。當夜二更。又調發陳興等。賈率訓練官陳信。合千人。陳俊部領水手等人。過河前去劫中賊寨。奪到番氈九牀。軍器等。同日午。虜賊擁衆。驅迫我界婦女。將白竹篠竹杷。前來填西門一帶濠。

港五處。當發孫中陳興。盡數用火箭射之。其竹篠五七處。各已燒盡。虜賊更無所施。申州報捷。衆曰。多有我界婦人。又恐射了我界之民。太守曰。此等婦女被擄。苟活偷生。尙爲虜用。縱射殺我界人。乃以保全城內許多生靈。亦無奈何。至申時。賊見火箭甚衆。又遣婦女盡刈田內新麥草桑葉。擁併前來填壕。又驅婦女。殺所燒地上場磚瓦。壓於其上。我軍火箭不能施巧。遂被金賊以門扇爲挨牌。擁過羊馬牆下。與襄與判府教授等。委陳興選槍叉。下羊馬牆內。賊入卽殺之。於是分頭掩殺。下濠敗北奔走。奪得番賊軍器。斬到首級十餘顆。收到弓箭三萬餘隻。箭上多有毛克攻下千戶印字。亦有黑捍箭。聞是頭目人射底。是日太守令速上布袋五千隻。告示營婦百餘人。併手做造。遂得以遮砲之用。是日晚。有虜扛廣濟縣牌額。自南而北回。度是燒焚縣治無疑。初五日。金人驅我界婦女扛鵝車洞子。百十座於河岸。與襄急飛申木州。太守親批與襄云。聞賊扛擡鵝車洞子。意來攻城。古法候其近城。宜多熬煎金汁。澆灌其皮。又使麻油脂油澆其上。用火牛燒之。皮自然縮作一塊。則賊無所施其巧。至祝誠之上。覆司理兄。與襄卽調發諸軍。一如前法以應。無一不勝。賊見其洞燼。焰不可近。但遠望。又腰駮看而已。至午。金賊又於西北團樓。燒我軍所埋壩上鹿角。却於壩上羊馬牆外。用松木八十餘條。立起對我團樓。其高過戰樓數尺。又用土布袋爲慢道。意搭雲梯以登我城。是夜無策以攻其退。事勢危急。又急呼諸將聚議。欲用火燒對樓。而相去有三丈餘地。火拋不到。太守與襄曰。如諸軍能燒其對樓。將官支賞銅會一百貫。餘人三十千。仍喝官兩資。是夜又委司法趙善臆。督統領江士旺。陳興領軍三十餘人下城。直趨對樓下燒之。城上令民兵更迭送下火把。至三更。對樓焚盡。卽飛申報捷。知府親批付與襄。令亟以所許之錢。分賞諸軍。人心大悅。同

日守城之人，太守勞以牛酒犒以官會。是日賊於羊馬牆外，窺穿地道五處，急飛申本州。太守以小批報與，襲曰：如賊窺穿地道入來，宜多方措置小口缸子，對其所掘處埋之。兵法謂之甕聽，如近則對取一穴，又準備流黃砒煙以薰之，洞口宜多準備叉槍手，以截其入。是日凡遇賊所掘處，皆埋一缸，窺穿不住。當日北門兩處亦被虜賊填過濠，窺穿三穴，南門亦有五處。是夜差民兵槍叉手二百人，茶商軍二十人，土軍弓手三十人，廂禁軍一百人，下城守羊馬牆，夾擊所掘地道之賊。又用火牛燒之，其賊不能施工而退。至二更，賊射虛箭於西門上，守牆之兵衆喊趕殺一聲，其中有禁軍張迪怯，攀上禁城，民兵二人又以槍桿取其上，守城官李保養所申，當依軍法行遣。申州照會，太守曰：身爲禁軍，未見交鋒，已先遁走，豈止脊杖可以盡其罪，遂斬於城上，以令其餘。守城之兵肅然不敢輕動。是日率在城人家秤鎚充手砲，以擊羊馬牆外窺城之賊。同日孫中與賊打話，賊云：黃州已打破了，汝國不還歲幣，又何不受降？孫中曰：黃州已是空城矣，不得以我新州比黃州。汝是只要討歲幣，如何却來打撈？汝更不去，我人馬會合來勦除，必無路歸。兼汝各有妻孥在家，番人云：是不由我也。初六日據北隅守禦官林知縣申，金人攻北門一帶城壁甚急，當日太守令與襲同通判及二機宜士元，領茶商士射百人前去策應，又調發陳興、孫中、賈率、訓練官曹全、王卞、王恭、何佃、陳信等百三十人，縋城與虜賊交鋒，搶奪到攻城器具及燒毀鵝車洞子無數。又燒其填壕竹杷子數堆，奪到雲梯十餘張，殺死番軍無數。我軍間被箭中傷，是日四門金人皆有雲梯臨城，所欠麻索甚多。宗子趙希岳守宅地客三十名，前來借事帳前，連夜打索百餘條，散四隅。是日東門亦得麻索之力，穿三鬚鉤，鉤奪雲梯五六張。至夜，知府遣梅必信三名催援兵，人給錢一百貫，借補承信。

卽三紙。二鼓渡河。行未及數步。被狗吠逐。而賊寨知覺。攔截趕逐。急走回州。天意不順。是夜遂不成遣。同日金賊窺穿倒羊馬牆數十堵。西北一帶尤甚。大扛牛皮洞子至城下。盡數被我軍焚燒。是日市上無麪賣。州府各借麪店麥五石。初七日望樓子報。番軍已拽大陣。分上下河橋前來。竊恐攻圍城壁。是日自蔡汝霖齋權司張亨白旗前來。已五日。援兵並無消息。金人復添黃州生兵數萬。有五方新旗插于廣教山頭。郡人告急。甚于倒垂。稟太守曰。今與褻以此身。期與城爲生死。急保城壁。乃所以保妻子。出遂糾率僉判趙汝標。司法趙善腴。衣朝服。與在城寄居有官無官宗室。詣聖祖殿。展御容。祭告祖宗。諸族人讀祝至二帝之恥。未雪。今復遭其蹂踐。處。淚下如雨。郡人羅列殿門之外。聞之亦相顧淚下。出詣三清殿。又許醮一百二十分。願保全城壁。是日虜賊又號哭我西南團樓。亦如初四日殺狗以厭之。至更盡時。聞東門擂鼓聲。須臾東門守禦官甯主簿嚴監轄申。有援兵至。太守親批令與褻躬往辨認。至東門見援兵數百人。已渡河至羊馬牆內。詰其子細。皆云焦太尉遣徐統制等人馬。前來策應諸軍。破寨至此。亦多有中射者。其中有一卒渡河失手死於東門。亦言廣濟縣被虜賊焚燒蕩盡。太守喜。一人行入城。一例各喝三官統制。犒設銅會五十貫。將官銅會三十貫。押隊管隊撥發各十五千。長行各五千。是夜共散官會八百五十五貫文銅會。百姓排門焚香以迎之。又有富室爭持壺漿以勞之。紛然而來。惟西北一帶。番賊不佳。以牛皮洞子遮護。於羊馬牆外。窺掘地道。被各隅以火牛焚燒。矢石交下。賊不能安迹。是日鐵連枷木太重。施打虜賊不及。與褻又造手砲二百餘副。分四隅。差人於羊馬牆內拋打虜賊。虜皆不得近。至晚各隅巡邏。徹夜略無少怠。同日太守又犒守城兵民錢酒。是日虜賊攻西北團樓。已擁衆登至半城。有百姓方通

因麻石頓於檻上。此人以頭頂起，乘空版，獨力推下麻石，壓死番軍數人。守城等盡喊推打，賊衆驚退。時監戰樓官飛申太守，犒支賞錢一百貫文。初八日，金人增添砲五座，攻打西北團樓。我軍亦添砲兩座，打虜賊切緣本州城，獨有團樓，而無馬面。兩邊無對敵之地，所以虜賊一意攻擊不住。是日辰時，太守批報與襄曰：虜賊攻圍甚急，外無救援之兵，臣子之心，義當効死。矧凡在城守禦官，世受國恩，當此憂危，宜各盡忠戮力，互謀抵敵。事定均爲奏功，併望示諸同官。是日虜人又於露字樓下，窺穿地道，與襄通判督將官江士旺、沈祚、賈率官兵於城上分布，以勁弩強弓射之，矢下如雨。番賊敗走前去，與襄急發兵百人，下城追擊之，斬首三十餘人。奏捷之時，太守各賞追敵之軍人各十券，喝官三資，應城上弓弩手各賞五券，亦喝三資。自是應有策應之兵，人人奮勵，迭遣擊賊，或守戰者，日有克捷。當日分武定軍徐揮萬聚等守西北團樓，常州提振守北門一帶。是日東門甯主簿嚴監轄，與總首梅必禮等，奪得雲梯二十量。時太守支給賞錢二百貫，同日金賊窺穿暑字樓，又西門脅樓、歲字樓爲字樓，五處不住。是日知府批諭諸處守禦官，多遣人於城下，各取其穴，對掘小孔道，燒煙以注之。與襄曰：虜不穿入城內，而又窺穿者，乃沿磚後取上，意卸我磚，非窺入城也。評議半日，太守力以爲不然。獨有阮教授乞差井匠數人，就虜人所窺處，女頭邊，如掘井之狀，以接其穴。是日對著所掘之穴，又以藥燻之。其賊扇所燻之煙，自下而上，賊云：我無奈何，實迫於相公之命而已。我在此逐些取掘，若有意掘時，多時陷了。汝有酒時，討些與我吃，則不掘。土人李該聞賊需酒，亟謀教官阮希甫曰：可從其所需。李該又云：家間開藥舖，有些毒藥，宜置酒中與賊喫飲。教授然其說，送酒與虜賊飲。是夜聞番吐之聲，而賊果不掘，死在穴者有之。諸處皆効阮教之策，金賊

或有求饑食者，亦加以藥。又虜賊於署字樓，施放砲石，日夜不住。獨西門知府帳前，與與襲帳前左右，鐵火砲最多，甚至打至臥牀屋上，幾於殞命。或者云：此有姦細，不然何以徑打兩處帳前耶？是日太守移軍帳於趙希岳家，就本人屋廊下，置局造箭，以應諸隅之需。是日四隅用過弓箭三萬隻，弩箭五千隻，與襲移帳於新寨。同日徐揮因入城，自有乘馬被賊射死，與襲自出己錢二百貫會買馬一匹以送之。倅車亦以銷金鞍一副與之乘騎，又以所乘之驢以與之。此固結其心，爲保守城壁計。初九日望樓子陳富報，番賊拽隊臨西南團樓河畔，當與與襲同阮教親督將官陳興等，弩手三十餘人，又發太平弩手王公十五人，茶商及士射等二十餘人，又發訓練官李斌，領敢死軍十五人迎敵。已被擁衆過樓下，窺穿地道，射死番軍無數。最太平弩王公等，百發百中，但其箭雖小，又以毒藥塗其上。虜見此箭，曰：蠻子以筋射我，時數人番賊眼睛各中一箭，隨即退走。被聶友中李斌等五十五人下城夾擊，虜兵大敗。是日太守收捷報，又批令與襲今夜宜更召壯士，劫其寨柵以撓之，無得坐授其攻也。當夜訓練官李斌等部，領敢死軍十五人，茶商三十人，直趨對河虜寨以殺之，連破十五六寨，奪得番搭袋、資糧二袋，番綿裘五條，皮靴弓箭等物。又斫到首級十餘顆。二更巡城罷，通判與四隅守禦官阮教授、林知縣、甯主簿、嚴監轄、統領孫中趨到帳前，稟太守曰：昨日雖得八百餘人入來，皆非用命之人，已分定地分，更不上城守禦，恐被誤事。太守於是批銀牌，告示百姓家，應有軍人在家歇泊，不上城守禦者，先將安下人家，依軍法施行。是夜人方勉力強上城，終不以社稷爲念，爲我堅守，與襲等又白太守曰：城外應援之兵，今早得報已在青蒿相去無四十里，尙爾稽遲不進，使我蘄州生靈坐以待盡。今金賊日夜逼迫，窺穿不住，攻之不退，上禱皇天，未

加震怒。下促諸將。未有奮前。祖宗累積幾百年城壁。與褻等痛切深恩。實無罪戾。夫何使與褻等與靳民至此耶。今夜更乞蠟彈十人。催援兵破寨前去。十人之中。豈無一二人可以突過虜寨。是夜太守遣百姓張四等十人。已過四五賊寨。其六人被賊衝回。所有蠟彈。皆與褻親書與焦思忠。鈐鑄張亨權司。及趙制幹官。位承節郎。特改差淮南轉運司。催發綱運物斛官。兼淮西制置司。準備差遣。督戰軍兵馬趙灑夫。其蠟彈云。如頃刻不至。則斬城必陷。他日罪有所歸。催援人過安慶府。陳監丞與陸察推炳所親見。趙運屬之開折。一語之誣。天實監之。初十日。番賊掘西北圍樓一穴。已如瓦墮。中間磚已卸數口。人心驚駭。恐其掘透。先用排沙木造重城於內以待之。是日北門守禦官董尉戡申。今日選得有膽勇五十人。願下圍樓。搶所掘之賊。戡亦願躬自督戰。與褻於是從其說。人各與酒一升。給錢三貫。以激其勇。是夜果大捷。同日百姓迎岳廟神於四門。其日虜賊攻城不住。以至婦人女子各賈勇。般石與諸民兵相接。擊賊渴不暇飲。是日徐輝乞將兩獄大囚充敢死軍。太守從之。兩獄共二十有五人。守西北圍樓。人各奮激。願効死戰。是日北門守禦官林知縣亦告急。被賊燒北門吊橋。當知縣委沈祚等八十餘人下城迎敵。與褻又調發孫中江士旺與李斌等敢死軍一百人。自西而北。與知縣所調之兵夾攻虜賊。得弓五張。槍二十餘條。斫到首級三顆。十一日。番賊攻擊西北樓。橫流砲十有三座。每一砲繼以一鐵火砲。其聲大如霹靂。其日對砲市兵賈用。因拽砲被金賊以鐵火砲所傷。頭目而霹碎。不見一半。又有同拽砲人傷者六七。其陣亡者。太守每名支錢三十貫。省被傷者十貫。西門樓亦被打碎。垂空版十餘片。與褻急遣統領孫中。以皮簾易之。屋上安排。以松枋如鋪樓之狀。砲石打落其上。人無所傷。皮簾之後。盡用磚石蓋砌。仍告示四門各

用枋排護。無使彼砲打傷。我軍屋上各安土布袋三百隻。以乘砲石。至午。賊又擁衆燒西門吊橋。又被我軍射退。同日。賊攻北門。與襄又同知縣林榮。調發沈祚射退。至夜。又遣陳興。訓練官王恭。廂禁軍民兵百五十人下城。前去南隅。填塞生字樓窟子。殺死番軍下濠。及斫到首級二顆。并奪到鉞鏗十餘柄。軍器等。委是大捷。是日。郡人聞黃州已破。恐城難保。怯者紛然。欲棄城而走。守倅力主與城俱亡之議。衆又謂。勸不可守。則賊必窺我安慶。無爲。倅車曰。不特安慶江面可憂。事已至此。守則亦死。出則亦死。不如與城俱亡。太守曰。守邊死。吾輩職也。十二日。番賊所掘諸處地道益大。旣入穴洞中。矢石所施不到。至辰時。虜用甃幔雲梯。併力攻打西南團樓。自早至暮。番賊欲搶土城。阮教授希甫同陳興。又用萬牛火燒之。賊方退。又以麻搭用水搭死火牛。我以石頭拋擲之。彼則用甃連頭面裹其體。而任我之拋擲。或閃於羊馬牆之屋下者。矢石一任。復入洞中窺穿。其日。武定忠勇等軍。以勢不可支。陽曰。焦太尉人馬到。誑東門守禦官。欲出門以迎之。甯主簿曰。不得州府指揮。安敢放人。縱得州府之命。不得制幹批帖。亦不敢擅放。於是姦計不行。復回地分。亦未嘗加力迎敵。惟民兵市民廂禁軍守城而已。其日。四門攻擊可畏。援兵又無音耗。番寨圍閉數百重。凡遣催援者無路而出。百姓稍有恐怯者。士子執教授手。相顧流涕。阮教曰。希甫亦有十餘口。非特百姓也。復來告急於與襄曰。我亦有妻子十六口。若保城壁。則妻子亦得團圍。豈意援兵今已多日。杳然無耗。萬一參差。各爲國而死。奈何奈何。於是揮淚而別。各守地分。其日。家家焚香拜告天。小兒亦有拜者。是日。火牛已盡。籬壁亦無得可拆。甚至逐家刷葦薦二領。以爲之備。十三日。虜賊擁衆攻四門甚亟。諸軍皆說虜賊今日大打城。與襄親冒矢石。督諸軍力戰。與將士曰。今四圍皆是賊壘。進退

等死。當從死以求生。軍民亦知其必死。人人爭奮。莫不以一當百。虜賊已見外援不至。覘我守禦之人單弱。日添砲架數座。攻打羽箭如蝟。惟攻西北圍樓最急。石砲之後。繼以鐵火砲。其形如砲狀而口小。用生鐵鑄成。厚有二寸。震動城壁。其日對砲兵士。詹進被砲打死。至午時。被金賊窺穿牆壁。坐損女頭三座。與襄卽時調發諸軍。先以布幕垂遮所陷之處。兩面用強弩射之。不與登城。又併力用排沙木桿禦。爪縛戰棚與之臨。自辰至酉。虜更三替生兵。攻擊不住。是日對敵百姓。官民軍兵食不下咽。以至搗鼓無人。與襄自步至寨中。呼喚小兒廿餘人。每名勞以百金。蒸餅一枚。賈勇搗鼓。以激士卒。交戰自辰至酉不退。是日酉時。虜賊擁衆排沙木縫。直登我城。有旗頭虜賊。方上城間。被茶商軍蔡全一槍。斃殺下城。於是虜賊大敗而退。莫敢進者。是日又添造布幕十副。十四日。望焦張兩司人馬更不見到。滿城疑之。未幾只見賊射弩箭無限。箭上朱字云。池州都統司造。人心益憂。度必與賊交鋒矣。但未知其勝負。是日四門攻打甚亟。各隅軍兵皆有傷重之人。最是暑字樓下。與西南隅樓。鐵火砲相繼及傷人最多。其日與襄督戰於露字樓。挽弓同諸軍射賊。回身取箭間。左脾亦中一箭。方付藥之頃。而董尉右手面亦中一箭。董曰。吾將家之後。中百十箭。此亦常事。阮教曰。苦哉苦哉。倅車教授曰。此爲國家矣。幸不在要緊處。可與二公書於功賞簿。事定則申。倅車每聞一處有敵。則親自監督。無敢畏避。是日有番陽客人詹太汪。太黎太等十餘人。爲商蘄州。因賊圍。遠城壁不得出。時時拽砲闕人。行下四隅。率單丁戶盡充拽砲。詹太等皆在其中。時聞援兵不來。事勢危殆。詹太等與甯主簿係是同鄉人。遂密語主簿曰。官人早作出城計。甯主簿自云。平時蒙太守知遇甚深。賊至日。太守嘗握手相語。勉以忠義。誓死城郭之語。到此但以好語遜謝。戒詹太等。

云萬一汝自得脫。急還番陽。且勿驚我老親爲祝。又自出其所得乃父書與同官看。亦莫不以忠義相戒。是日賊放砲不住。西北圍樓已成粉碎。人不可近。所幸圍樓之內。已用磚整砌。虜賊欲登城而上。亦無自而入。所有大囚敢死軍二十五人。自辰時與賊于女頭交鋒。賊上者戮死。竟不得上。蓋人心奮發。心力齊故也。是夜徐輝爲見賊勢益熾。與常用畏怯不守。至三更。領兵八百餘人。潛地逃遁。盡出南門頭。誑郡人曰。官司調發我出城劫寨。百姓驚駭。急來走報。時都吏王達繼至。告訴甚急。與褻不候卒馬。徒步走至南門。已被打開鎖。常用登門。方拽起吊闌之時。與褻多方禮問。二將曰。若是劫寨時。何用騎馬。及帶婦女出城。汝若奔城而去。百姓自守無虞。汝等有何面目。更食官祿。與褻情迫意切。未免望闕遙拜。苦告之曰。汝不以百姓爲念。當以宗社爲憂。汝曰。我是策應之師。如不入城。則責不及汝。今旣入城。則當與城爲存亡。豈可打關鎖逃遁。汝等得何罪名。全無州縣制節。在外則爲應策。在內則當守城壁。汝等宜以宗社爲念。不然則殺我而去。不妨。各人無說可答。常用曰。欲要人馬守城。宜多出錢以撫諭之。武車繼至曰。諸統制不可如此。趙制幹所諭甚當。亟回兵守地分。若能保全得城壁。事定。鉅與太守一力保奏。其功不小。鉅當親爲汝等稟白君相。力言汝等勞瘁之功。與褻以宗社爲念。與倅車曰。每名聽徐揮等喝。賜錢多少。撫諭其回。倅車曰。縱太守不認。鉅出經總制庫錢兌支。不妨。制幹但穩心事定。鉅自與朝廷出豁。阮教與諸將曰。甚好。旣通判制幹主盟。宜早回兵守地分。恐彼處虛怯。爲虜所知。于是徐揮自喝長行銅會三十千。將官百千。統制二百千。是夜七名將校。八百四十九名長行。共支三萬六千二百七十貫文。方始回兵。歸新寨。已四鼓矣。太守卽令支出上項所犒錢會。付與褻躬親俵散。十五日。虜賊四門各打火砲入來。獨西

北圍樓自早至次日達旦。火砲不住。人心方皇皇。虜賊攻城愈不可遏。飛申本州。太守批報云。攻城方急。可厚賞軍兵下城。審觀形勢。料度彼已見得委可以前進。劫其寨柵以燒之。誠之覆司理兄。是夜南門守禦官阮教。遣陳興等百五十人。自支錢一百五十貫犒設。是夜劫中賊寨。奪弓數把。殺死番軍甚衆。與袁又遣孫中曹全茶商軍等人共百三十餘人。自西而南。與教授兵夾擊攻打。賊盡過濠走。十六日。賊擁衆增添兵馬。分布四門夾擊。攻打城壁。奸計百出。添立砲座。矢石交下如雨。委是危急。與袁賈率士卒多方抵敵。雖城之窳穿二十餘處。獨十三處最大。終不能便陷我城。至日午時。喜得一雨。滿謂可以使虜賊退遁。以保全生靈。不意火牛被雨。燒燎不着。又賊虜以濕氈搭撲火頭。至二更。風色不順。賊又以火砲石砲相繼攻打。民兵無容足之地。遂被虜賊以雲梯登城。不委徐揮一隅之兵。畏怯不戰。只令本州新刺敢死軍二十五人。獨留當抵地分。遂至寡不敵衆。被虜賊擁上城壁。殺死二十五人。而徐揮常用等八百四十六人。弃城先遁。人心皇駭。遂致虜賊上城。分兩頭將守城人殺戮。與袁急追徐揮至八字橋。而水深不可過。追趕不及。但背後大罵。徐揮常用配軍。汝弃我城遁走。與袁計無所施。惟搥胸叫苦而已。復思斬城數百萬生靈之故。急遣二卒分頭飛報守倅。與夫四隅官。前來策應。倅車先到新寨。而虜兵尙未敢下城。太守繼至新寨。調發西門統制孫中。與夫統制江士旺。陳興。曹全。丘卞。廂軍。禁軍。茶商軍。敢死軍。李斌等。戮力巷戰于新寨。須臾寨內火焰四起。被賊追殺至南門。守倅與袁及同官。自此各不知存亡去向。但聞孫中厲聲喝令諸軍鬪殺。報答國家數聲而已。其江士旺孫中。卽爲虜殺。賊遂擁衆分頭攔截。趕與袁至城之東南角上。其賊先叫知府通判趙制幹在何處。可出來受降。不伏。活捉來剛了。當是時虜騎滿城。

幸身衣軍人綠布衫。雜在亂兵中。越更有餘。痛楚悶仆。既甦。視左右積尸。皆身首異處。獨背後又有一衣綠布衫者。屢仆屢起。卽視乃同官趙司法善臆也。與褻先時在圍中捍禦。已身被數箭。及跳過羊馬牆外。隨逐百姓赴水渡河。其時月明。又被虜賊兩面夾射。于頂上右脅左臂連中三箭。幾致仆地。遂使妻徐氏與兒女一十五口。無餘處死。卒斃賊手。痛不忍言。加以出身文字。留在客舍。片紙不曾將帶。盡被焚蕩。與褻言之至此。顛天莫聞。惟有痛徹心膂而已。與褻切照番賊攻圍蘄州。前後二十有五。日守倅衆官晝夜親自擐甲登城。督勵官兵對敵死戰。及遇夜出城劫寨。梟到番軍統領首級。奪得銅印。生擒番軍馬攻城器具。雲梯。鐵鑊。焚燒鵝車洞子。及用萬牛火燒拒虜賊。不容上城。屢使敗退。竭盡心力。無所不至。只緣寡不敵衆。無所屈。至十六夜二更。徐揮常用領兵逃遁。其所守城地分無人把守。遂被虜賊蟻附登城。四隅守禦之人。一時驚駭潰散。當下蘄州失守。與褻與司法趙善臆。身衣軍服。遂得于積尸中死而復活。半夜奔從南門。迤邐自用源步直趨費龍嶺路。天色漸曉。沿路借問援兵不進之因。或言權司張亨路鈴焦思忠。陳輔。朱虎。祝文蔚。王振等兵在高山。旣至高山。則云在松楊橋。至松楊橋。則云青蒿。至青蒿。則云在車坊。至車坊。則云在石龍坡。至石龍坡。則云在四祖山。至四祖山前。則云在太湖縣。至太湖縣。則云在小池。至小池。則云二項人馬一則張亨之兵。畏怯不進。爲虜所覘。至十二日。被賊徑捨其寨。以致大敗。一則焦思忠。陳輔之兵。被趙灑夫之所牽制。略無進意。十二日夜二更。與權司張亨兵走歸安慶府。其路上人又云。十三日有許都統倭之兵。已到濯港。是時黃梅縣率百姓宗室共百餘人。焚香欄拜。乞其人援。彼則曰。朝廷差我策應黃州。卽不曾策應蘄州云。我已得朝廷文。只令我回守江面。微笑不願。徑自渡江而去。

其它如朱虎之兵，則止于三角斗方等山。去城七十里。王振之兵，則止于羅田縣。往來蘄春界內。祝文蔚之兵，駐于桃樹山之間。去城五十里。遞皆相持不進。又有如袁海之兵，方前而王辛之兵隨卻。皆未嘗有入城之境。大抵驕兵貪利。所過以擄掠爲心。寇至則安坐于高山。畏怯不前。寇退則聲鼓驚趕。其後以收復爲名。城內倉庫擄取未盡者。首卷之而去。及沿路擄掠。以至婦女耳環。不待取而連肉墜下。有甚于寇者。不止一端而已。故前乎援兵之未至。越二十有五。而城不陷者。實本州官寮民兵同守之力。後乎援兵之既至。止得數日而城遂陷者。實徐揮常用不用之故。與夫諸將相持不進之罪。以此可見。使援兵併力解圍于二十五日之前。則蘄城委無可破之理。使蘄亦如黃。不能爲二十五日之守。則自舒以及江面諸州。深爲可慮。又不至此。與襄等一介書生。平時不習軍旅。倉卒寇至。蒙守倖委使。糾率官民。戮力守禦。幾及一月。與襄圍門一十五口。均與守倖而下骨肉。盡淪歿于賊手。仰報國家。其于忠義。可謂盡矣。諸將反以佚罰冒賞。自謂得計可乎。與襄昨者起。剋制臺。驗傷之後。卽乞放令伏闕。亟爲蘄民訴此冤痛。制帥惻然。謂擄旣退。蘄州不可一日無官。姑俾攝倖貳之職。力任經理之責。安集留歸之民。未免忍死一行。亦欲訪問。知通同官眷屬之存亡。與夫妻兒之遺骸。于是辭不獲已。拜命星奔。還望蘄城。乃知童統制治墨屏棄。一例焚毀。無從辨認。至城之日。不忍舉目。官民屋宇。倉場庫務。盡成煨燼。骸骨山積。枕藉河井。終不能稽考。惟撫手掩面。痛哭而已。及後來多方體問。則知賊勢橫潰之時。太守李國錄與秦通判等。遇賊於子城之十字街。各自隨之兵。殊死鬪敵。是時死傷略盡。太守奔歸郡治。呼骨肉令速赴水自盡。其二機宜士允。自三更上城後。已不得反顧其親。太守尋迺就設廳。引劍自刎。倖車亦歸倖廳。厲聲呼吏人劉迪。

急令人放火燒諸倉庫。不得留與虜賊。遂設一室自焚。其時白袍猶未脫體。其子三將仕。復同時就盡。時有老兵牽倅車之衣以出大場。尙喝老卒曰。我爲國死。汝等可自求生。旣教臨危之時。聞有寄居武臣。挽其受降。曰。我豈爲此哉。卽時歸衙。先遣其子女赴井。然後自投身于廳前井中。此見于教授廳節級鄭正之所說。判官趙汝標。與知縣林榮。嚴監轄剛中。甯主簿時鳳。于事亟之際。相語曰。我輩守城調發。幾及一月。滿謂援兵之至。可以保全城壁。豈意使我輩遂至死地耶。我輩自爲之計可也。若見番賊。必無全軀。于是相率投身于子城河內而死。至今人皆能言之。夫見危致命者。忠臣之心。視死如歸者。烈士之勇。斬之守倅而下。寧有愧于此者。有如惠民一倉。實李守之所創。糴米三萬石。當時議者孰不曰。此倉不可創。恐爲後人塵腐之累。而李國錄確意爲之。今歲增一萬石。以爲後人補虧之助。及斬一破。應千庫宇。不留片瓦。惟此倉獨存。今日飢民流歸者。賴此存米。故得不死。以此見憂國念民。身歿之後。人被其澤如此。嗚呼。有善不敢蔽。不善不敢匿。平時享國厚祿。一日能以死報國家者。幾何人哉。事變已定。或者反議。斬之生靈遭荼毒。皆太守不縱其早出之過。且虜寇突至。圍遶數百匝。使如諸公之議。百姓先死于二十五日之前。而不在二十五日之後。蓋虜旣臨城。出亦死。然使堅守于內。而待援兵于外。則守固未必死也。今之死。正在于外援之不至。豈應歸咎于共守而不出。況使當時城未破。而先放老小。必又有張皇之責矣。天下之事。履而後知。未嘗親歷其事。其可輕議哉。此張巡許遠之受謗。韓昌黎爲之不平也。今則與襄等二十五日。調發堅守之勞。不足道。閩門十五口骨肉之淪亡。與夫守倅同官全家之屠沒。亦不遑恤。以至宗室宗婦。宗女。百姓子女。爲之生擒而去者。又不言矣。惟是社稷安危之所係。大爲諸將之所誤。莫如斬州言。

之使人痛哭不足。而繼之以血。何則。使當時徐揮常用之兵不入。則百姓各以妻孥爲念。盡力死守。豈肯一闕而散。城固未必陷也。往者不可追。來者猶未已。虜賊固可恨。而諸將豈能使百姓無憾耶。且徐揮常用之入城。終始七日。每以領兵欲出爲辭。恐嚇州家。邀取厚犒。暨至十六夜。領衆奔城。奔遁。至于大聲疾呼。明告虜賊。令放出一條生路與我去。你自入城。圖取金帛。故破城之後。有被虜人開諭賊酋曰。我不解便打破你城。是你大軍自奔與我。且我明日十八日也。自要去了。果有此言。則使當時徐揮常用。十六日夜不奔城。自遁。與夫焦思忠張亨。不畏怯走歸龍舒。則虜賊安得自有此語。今則千里之民。皇皇然若有虜寇再至之憂。且謂賊去之日。又言秋涼必爲取安慶計。今百姓盛額相告。咸謂兩淮之地。自此終無寧日。由是扶老攜幼。賣贖買舟。爲渡江計。又況今春虜人之破關。一日夜。頃行三百餘里。深入內地。如履無人之境。今長淮平坦。略無阻礙。旁蹊曲徑。彼所盡知。城壁闌隘。旣未盡修。兵甲器械。又未盡備。歸正餘黨。所在尙存。方一秋涼。復起覬覦。不由關隘。而由他途。則銜枚疾走。舉足之頃。入吾堂奧矣。雖有遠水。其能救近火耶。況斬之金帛女子。不啻數萬計。賊旣席卷而去。至于二郡造舟之人。與夫造弩之匠。百工技巧。悉爲生擒而行。此其爲謀。必不淺矣。又聞淮之耆老皆言。虜人寇邊。未有得志。如今日之甚。如其猖勝。而復來。遺民又無死所矣。近者流歸之民。皆感泣而來。言曰。某等與司理同死生患難。今斬之守倖等官。士子百姓。同時爲國就盡。獨所存者司理一人而已。若司理緘默而不爲我已死之民。直言其事。竊恐上下蒙蔽。朝廷莫知。再爲它日之禍。而國家用將。終爲此曹所誤。司理亦爲泉下之罪人矣。請與襄直書始末。以訴冤憤。欲使觀者知斬城之陷。非郡官士民無備之罪。實皆援兵之所誤爾。與襄災患餘生。死不敢愛。

呼天一鳴。以祈省覽。且爲它日之攷證。

李茂欽死守蘄城。併毀其家。立志最堅。受禍最慘。或罪其志有餘而才不足。則亦苛矣。武定軍入城。反爲郡害。金陵軍及境而不恤郡急。池軍怯而不進。雖有張巡許遠之才。不得霽雲萬春之助。決不能以千人之力。守九里之郭。卻數萬騎之虜矣。韓昌黎論巡遠事。以爲當是時。奔城而圖存者。不可一二數。擅強兵坐而觀者。相環也。不追議此。而責二公以死守。亦見其自比于逆亂。設淫辭而助之攻也。私意妄議。從古則然。要之久而自定。昌谷曹彥約。讀泣血錄。爲之置涕。

嘉定辛巳八月二日壬午褒贈立廟錫爵指揮

勅送到樞密院關樞密院奏准西制置司申照對近准樞密院劄子節文據前權蘄州宣教郎安慶府太湖知縣劉襲狀申開具到蘄州州縣官及因賊死難之人劄付本司更切契勘有無全家死難人數保明供申本司遵稟行下蘄州知州從實契勘供申去後回據武經郎特差淮西兵馬鈐轄權知蘄州趙汝擢狀申遵稟專委承節郎安慶府蘄州巡轄權兵馬都監張偉逐一契勘去後今據本官狀申照得一項契勘應宗室之家有無被害見存嫡親人數緣卽無被虜人回難以尋問外有州縣官全家死難人數開具申州除已行下宗室尊長司喚上見存在上宗室契勘別狀供申今具下項州司亦已具一般文狀供申樞密院照會所據武經郎特差淮西兵馬鈐轄權知蘄州趙汝擢狀申備錄在前伏乞亟賜敷奏將逐官褒贈仍錄其家以爲忠臣死節者之勸伏候指揮

一知郡李誠之與令人許氏男二機宜士允姪九機宜士宏二房媳婦孫女二人婢僕五人全家死難有長男偶留婺州東陽守家見在

一通判秦鉅與男二人將仕婢僕五人私僕三人全家死難有男秦滋見任鹽城知縣

一忠翊郎靳春知縣林榮與男婦宅眷共七口全家死難有長男先扶護孺人靈柩先歸鄉見存

一儒林郎州學教授阮希甫與男三人女三人婢僕共一十口全家死難見有兩男在鄉廣德軍居住

一迪功郎判官趙汝標單騎在任死難有母親令人宅眷并男女各一人見在衢州不會在任

一迪功郎知錄杜謬先已身故未離廨舍有男三人姪一人孫一人婢僕共七口死難有女杜氏被虜
走回見存

一保義郎新斬春知縣童蒙正未交割身故有男二人宅眷共五口死難有姪二人被虜走回係童統
制將帶歸濠州前去

一從政郎司理趙與袞得脫性命獨存有孺人徐氏縣主太保四人嫡子四人婆婆婢僕安童共一十
五口全家死難

一迪功郎斬春主簿甯時鳳并孺人男女各一人婢僕共七口全家死難有長男一人與父甯宣義見
在寄居饒州

一武翼郎駐泊都監張廣并女一人死難有孺人一人被虜走回見存

一保義郎兵馬監押溫玉并女婿外甥婢僕各一人死難有孺人一人被虜走回見在

一修武郎兵馬都監趙師瑄全家十口死難

一成忠郎在城監務梅譽全家四口死難

一忠翊郎本州監岳廣李俊全家死難

一承直郎斬口監鎮嚴剛中係本州牒委上城死難有宅眷與男一人孫一人見存

一忠翊郎斬水縣尉董戡本州牒委上城守禦并宅眷同入共七口全家死難有男一人見在建康府

父董侍下

- 一乘義郎鄂州武昌酒稅安允恭。全家死難。有男安邦才。見在。并孺人張氏被虜走回。
- 一承節郎添差酒稅朱思恭。全家死難。有男朱世明見在。
- 一成忠郎嘉興府新城酒稅姜應春。全家四口死難。
- 一武翼郎主管台州崇道觀景坦然。家六口死難。有孺人鄭氏。男景世隆。媳婦郭氏。共三人。被虜走回見存。
- 一武經郎主管台州崇道觀秦安上。全家七口死難。有兩女兩男。長秦邦俊。次秦邦漢。被虜走回。
- 一保義郎本州監廟劉忱。全家死難。
- 一訓武郎本州指使錢珪。全家死難。
- 一進勇副尉本州指使王明。全家死難。
- 一帳前佩印官前獨木巡檢保義郎李鈞。因差出部。押犒軍官會。至張都統寨門。被虜死。有孺人并男。見寄居黃梅縣。
- 一進勇副尉本州使臣鄭俊。全家死難。
- 一迪功郎新安慶府宿松主簿梅必勝。全家死難。
- 一借補迪功郎戴栩。全家一十口死難。有妻李氏被虜走回。
- 一高州文學祝棣。上州文學祝遂良。各全家死難。
- 一新三湖巡檢承信郎雍顯。單騎死難。

一迪功郎本州監廟程思周全家死難。

一守禦主兵官統領進勇副尉孫中統領承信郎江士旺統領進勇副尉李浩訓練官曹全李橐統領進武副尉林安仁統領進武校尉鄧宗統領進義校尉王文明統領進武校尉吳宗政各係巷戰死難有老小男女各在本鄉。

一前池州醫藥飯食修武郎戴翻被虜走回有妻男孫女婢僕共一十三口死難外有長男女使安童各一人走回。

照得寄居官李俊等一十一員并借補戴栩添差朱思恭被虜走回戴翻並難以推恩施行及司理趙與襄因單身出城已行追罷外正月五日三省樞密院同奉聖旨李誠之秦鉅各特贈五官更特贈祕閣修撰仍各追賜紫章服特與三名迪功郎恩澤並特追封侯爵同賜額立廟于本州令戶部各特賜銀絹二百匹兩給付各家李誠之妻許氏特贈令人男士允特贈通直郎姪士宏特贈承務郎媳婦孫女各特贈安人秦鉅男秦浚潭特贈通直郎林榮張廣趙師瑄各特贈三官各特與一子承信郎恩澤阮希甫特贈通直郎仍特與一子登仕恩澤趙汝標甯時鳳各特贈承務郎各特與一子上州文學恩澤杜鄂特贈承務郎童蒙正特贈兼義郎內杜譔童蒙正仍令本州津送各歸寄居州軍溫玉梅管董戡各特賜三官各特與一子進武校尉恩澤嚴剛中特贈三官特與一子下州文學錢珪李鈞各特贈兩官各特與一子承信郎恩澤王明特贈承信郎與一子下班祇應恩澤鄭俊特贈承信郎特與一子進義副尉恩澤孫中李浩林安仁王文明吳宗政各特贈承節郎江士旺特贈三官各特與一子下班祇應恩澤鄧宗特贈保義

郎特與一子進義校尉恩澤曹全李棗各特贈承信郎各特與一子進義副尉恩澤李俊安允恭姜應春景坦然秦安上劉忱姜必勝祝棣祝遂良雍顯程師周並令本州各委官以禮致祭仍量與周給其家添差官思恭亦仰本州契勘如本人係外州軍居卽與津送其歸仍令吏部日下出給合受告文公據限十日繳申樞密院敕送到禮部狀承司封關節文准嘉定十五年正月九日樞密院劄子奏淮西制置司申乞將李誠之秦鉅褒贈以爲忠臣死節者之勸正月五日三省樞密院同奉聖旨李誠之秦鉅各特贈五官更特贈祕閣修撰仍各追賜紫章服特與二名迪功郎恩澤並特追封侯爵同賜額立廟事本部尋速送太常寺詳關內備坐聖旨指揮施行具狀申部去後今據本寺申准速送下承司封關節文正月五日三省樞密院同奉聖旨李誠之秦鉅並特追封侯爵同賜額立廟本寺今遵依前項聖旨指揮今擬封下項一蘄州知郡李誠之通判秦鉅合同賜額立廟今欲擬褒忠廟爲額合行降勅一蘄州知郡李誠之合擬封二字侯爵今欲擬正節侯合命詞給告蘄州通判秦鉅合擬封二字侯爵今欲擬義烈侯合命詞給告所據太常寺擬封在前伏乞朝廷取旨賜額加封施行伏候指揮二月四日奉聖旨依禮部施行

李誠之告詞

勅故承議郎權發遣蘄州李誠之蘄春雖介在疆場然所恃以爲險者六關也朕命憲臣往專備禦之責而措置疎略負我使令爾儒紳之望屬分符守以孤城而嬰虜鋒蓋亦難矣慷慨激烈盡其命義闔門死難朕甚痛之迺加論譔仍躡崇階爵之通侯廟食茲土賞延于後並命一時夫忠臣之心非慕名祿國家之澤嘗峻彝章今密印疊疊未足爲爾寵將滅此驩虜始足以慰九泉也可特贈朝散大夫祕閣修撰

秦鉅告詞

勅故朝請郎通判蘄州秦鉅。蘄春雖介在疆場。然所恃以爲險者六關也。朕命憲臣往專備禦之責。而措置疎略。負我使令。爾相閱之華。屬承郡事。孤城岌岌。莫抗虜鋒。能佐其長。服節守義。父子同隕。朕甚哀之。迺加論譔。仍躡崇階。爵之通侯。廟食茲土。賞延于後。並命一時。夫忠臣之心。非慕名祿。國家之澤。當峻彝章。今密印纒繫。固痛在闔門。而榮在九泉也。英概如存。尙克欽止。可特贈朝議大夫。祕閣修撰。

阮希甫等告詞

故儒林郎蘄州教授阮希甫。可特贈通直郎。

故迪功郎蘄州防禦判官趙汝標。可特贈承務郎。

故迪功郎蘄州蘄水縣主簿甯時鳳。可特贈承務郎。

故承直郎監蘄州都太監轄蘄口鎮倉庫兼烟火公事嚴剛中。可特贈承事郎。

勅故阮希甫等。烏乎蘄水之禍。朕固聞之。而未盡詳其人也。邊臣以名來上。則汝等皆死其職。以及其家。冤乎痛哉。一至于此耶。殆于王事禮有加等。超昇京秩。官其後裔。忠魂如在。尙服寵光。可依前母。

李士允等告詞

故承議郎權發遣蘄州李誠之男士允。可特贈通直郎。


故承議郎權發遣蘄州李誠之姪士宏。可特贈承務郎。

勅故李誠之男士允等。爲子姪而從宦。莫樂乎五馬之榮。汝等獨罹兵鋒。共死邊壘。京秩之賁。豈能汝華。

亦姑以塞予之悲耳。可依前件。

秦浚等告詞

故朝請郎通判蘄州秦鉅男秦浚。可特贈通直郎。
故朝請郎通判蘄州秦鉅男秦灑。可特贈通直郎。
勅故秦鉅男浚等。蘄春佳郡。士大夫樂于宦游。況爲貳車之子弟哉。今或反是。汝等與罹其禍。此朕所以
蠶傷也。畀之京秩。尙庶幾泉下之榮。可依前件。



中興禦侮錄

撰人 不詳

中興禦侮錄

本館據粵雅堂叢
書本排印初編各
叢書僅有此本

中興禦侮錄卷上

無名氏撰

女真部落初三種曰生女真熟女真黃頭女真金國卽生女真之所出肅慎氏之遺種也居籍大遼之東北族帳最爲強盛其酋有楊割太師者驍勇雄毅善御其下爲諸部所推數與黃頭熟女真爭長相攻卒服屬之因其衆稍侵略旁近諸小國而蠶食焉雖臣屬契丹二百餘年頗叛附不常後天祚浸失道遂絕朝貢誘納叛亡潛圖異志終其世未有以發之楊割死子阿骨打立用其弟吳乞買姪粘罕兀朮輩謀興師叛之數月之間攻陷城邑數十遼人師屢戰奔敗天祚度不能禦遂割遼東諸郡與之以議和遣使册命爲東懷國皇帝永爲兄弟阿骨打發册怒曰東懷者乃書稱小邦懷德之義是薄我耳杖其使遣之歸遂自立爲大金國大聖皇帝建元天輔時本朝政和八年契丹亦天慶八年也始金國起事之初遣使航海與本朝議夾攻約併有遼國後以五代所陷沒燕薊舊地盡還中國旣得志則背其約朝廷遣使屢請復言欲得舊與契丹歲賂銀絹數外別取燕城地歲出租稅百萬緡然後與地仍預借兩歲徽宗不得已悉從其請所有燕中戶口職官儲畜等盡席卷而東朝廷勞師累年捐金緡數百萬計所得者空地而已初童貫出師與之夾攻也金人先已得遼地十八九所未下者燕京數城耳貫不能取復藉其力始克於是遂貽彼笑故使粘罕輩有輕視朝廷南窺中原之意矣阿骨打立六年卒弟吳乞買立改天輔六年爲天會元年雖謀欲南犯而猶豫未發旣得吾叛臣劉彥宗及契丹叛臣耶律余覲遂與之謀二人者力勸

圖南朝仍不必以衆。因糧就兵可也。宣和七年。時金國天會三年果率衆南犯。燕山統帥郭藥師首以城叛降。遂以連兵入寇。時朝廷久安承平。民不知戰。一旦倉卒變起。列城無與抗者。故使虜衆得以長驅中原。攻陷京闕。既邀二帝出疆。遂立宰臣張邦昌爲僞楚。以主中國地。然後完師歸國。繼聞建炎皇帝自河北建師入嗣大統。移蹕維揚。復舉衆來寇。江浙荆淮尤被毒螫。然虜勢雖寢猖獗。而我亦屢敗其師。粘罕因拊髀歎曰。使南宋靖康閒有此兵力。我安得至此耶。會郭藥師有異圖。粘罕因立劉豫爲僞齊。主河南地。遂領兵北歸。骨打之孫竄立。初阿骨打開國時與弟吳乞買約兄弟子孫互相傳受阿骨打死吳乞買既得立及吳乞買死阿骨打無子故復立其孫者以遵先約也仍舊稱天會越三載始改天眷。撻辣旣得專兵柄。再率衆南犯。始攻蜀。喪師於吳玠。乃折箭誓曰。天命所在。未可圖也。於是獻和親之計於竄。竄亦厭兵禍。遂從其議。時劉豫初廢。河南不順。遂以其地復歸於我。兀朮謂撻辣縱敵生患。陰有異志。矯詔殺之。復舉兵以陷河南地。洎順昌之役。爲劉綺所敗。時暑雨暴注。兀朮之帳一夕三徙。懸釜而炊。士卒疲不能軍。狼狽駭走。由是兀朮大慟而歸。知未易圖也。又萌古撻鞬等國。宿讎未除。恐其中有起而謀之者。故以重兵壓境。因吾回使莫將韓恕通好約。和。太上皇帝以頻年暴師。亦務休息。秦檜力主和議。遂從而許之。時紹興十一年。虜之皇統二年也。竄立十四年。弟亮弑竄。廢爲東昏王。以代立。改皇統九年爲天惠元年。亮。梁宋國王阿里勃之子也。阿里勃。靖康初同粘罕陷京師。稱二太子者是也。狀貌魁梧。方口牛目。耳垂肩。鬚過腹。涉史傳。便習弓馬。性貪虐淫侈。篡位之初。東昏時功臣懿戚及所忌者。屠滅無遺。又置炮烙剝剔之刑。以威其下。國人怨之。所任信者。皆吾之叛臣。如施宜生。馮長甯。張中孚。中彥等。列置臺省。

倚爲心腹。而李成、鄺瓊、孟斌、孔彥舟之徒，各主兵務，任爲牙爪，與之謀，爲南牧計者，未嘗一日忘也。宜生尤爲亮所倚信，用以爲相。力陳南侵計，且勸亮都汴。左右或陳不可狀，亮曰：「使吾爲中原天子足矣，何爲不可？」遂下詔遷都。有咨爾萬方當懷一統之語，蓋恥爲夷狄，欲紹中國之正統耳。時紹興三十一年，虜之正隆六年也。亮以是年六月入汴，方升殿受賀，忽暴風雨雹，殿瓦震動，宣德門鷓鴣忽墜。亮心惡之，識者知其必敗。先是夏五月，遣龍虎衛上將軍殿前都提點高景山、通議大夫尙書刑部侍郎王全來賀生辰，因以欽宗訃音聞，乃請割江水以北、漢水以東之地，又邀求宰臣湯思退、陳康伯、知樞王給、殿帥楊存中、知閣鄭藻等出疆議事，冀吾不允，以開兵端。上不許，二使所請不獲，陛辭，語甚不遜。上大怒，馬軍帥成閔、廷叱其無禮，請殺之。太傅楊存中、止閔曰：「吾黨欲忠義報國，當爲朝廷宣力疆陲，今徒殺此曹，何益？」閔奏乞出治兵，願以死雪國恥。上顧謂侍臣曰：「二十年來卑辭厚禮，罔敢不至者，爲吾生靈，堅守盟好耳。今其君臣不道，相與謀人之國，不顧巢穴，忘命深入，以我爲易與，我豈不能以百萬之衆，仗義而較曲直哉！左右咸贊其說。」秋七月，遣同知樞密周麟之、知開門事張掄往賀遷都，因令覘其動息。麟之辭不行，請權許割地方可往，貶筠州。以樞密都承旨徐嘉代行。及境，亮不納，遣中議大夫翰林侍講韓汝嘉、費金牌至，傳僞旨云：「昨令景山全傳旨召數大臣等，有所宣諭，今卿等雖來，卽非所召者，可使回去。速令元所指定人同來稱賀，仍須限九月初定到闕。」上以虜盟旣變，決意用兵，始召邊臣增飭守備，分遣禁旅屯據要害，命威武軍節度使鎮江府都統劉錡、進屯淮陰，清遠軍節度使建康府都統王權、進屯合淝，寧國軍節度使

池州都統李顯忠、進屯安豐、寧遠軍節度使江州都統戚方、進屯固始、安慶軍節度使鄂州都統田師中、進屯□□軍。尋以吳拱代之承宣使荆南府都統李道、進屯□□。華容節度使金房州都統王彥、進屯漢陰。天平軍節度使利州都統姚仲、進屯大散關。各率本部軍馬嚴兵以待之。除少保奉國軍節度使判興州吳璘、爲四川宣撫使。太尉威武軍節度使鎮江都統劉錡、爲浙西淮南江東西路制置使。慶遠軍節度使主管侍衛馬軍司公事成閔、爲京西湖北路制置使。分護諸將。亮旣不獲所請。憤然謂其下曰：我謀南伐已久。但未有其端。今出師有名矣。盡簽河南北女真渤海大漢奚契丹兵。號二百萬。駐京洛間。命大懷忠爲都督以統之。將行。召諸將與折三箭爲誓。初折一箭曰：朕此行若不下江南。誓與卿等不返國。次折一箭曰：金玉子女悉爲將士賞。不用命者殺無赦。次又折一箭曰：大議已定。敢諫者死。亮一日酒罷。母啓曰：江南自和之後。執禮不缺。一旦無故興師。徒使生靈坐受塗炭。亮謂沮師犯令。殺以徇。九月。遂率衆分道南寇。一軍攻淮甸。大懷忠統之。一軍攻襄漢。劉萼統之。一軍攻川陝。張中彥統之。別起一軍。係簽發山東水手諸國兵。浮海攻浙右。蘇保衡統之。亮自將女真親屯壽春。九月十八日。首以萬騎寇蜀。吳璘出兵距戰。對壘於寶雞河。夜遣驍將彭青劫之。斬首數百級。降者二千人。二十三日。盱眙軍小校夏俊。結衆數百。號義兵。襲破泗州。僞知州安撫使蒲察徒穆。同知大周仁。宵遁。俊保西城。東城未下。俊夜遣人誘其降。明日。官吏軍民相率以迎。海州軍士魏勝。殺其守將。亦舉城來歸。俊補武翼郎。關門宣贊舍人就知泗州。勝補修武郎。關門祇候。就知海州。十月初六日。御史中丞汪澈。充京西湖北宣諭使。四川宣撫吳璘。兼陝西河東

招討使出隴右。江淮制置使劉錡兼淮北京畿東河北東路招討使。出睢陽。京湖制置成閔兼京西河北西路招討使。出南陽。督諸道兵三路進討。軍前檄告契丹西夏高麗渤海韃靼諸國。及我河北河東陝西京東河南等道官吏軍民等。蓋聞惟天無親。作不善者神不赦。得道多助。仗大義者衆必歸。敢據一切之誠。用諗萬邦之聽。我國家功高上古。澤潤中區。列聖重光。方啓昇平之運。斯民不幸。適丁板蕩之秋。姦茲女真之微。首覆契丹之祀。枯其新造。開我不虞。妖氛旣陷於神都。虐燄殆彌於屬縣。兩宮北狩。迄羅胡地之煙塵。大駕南巡。未正漢宮之日月。凡居率土。誼不戴天。主上紹開中興。宏濟大業。望山河而隕涕。瞻陵廟以傷心。蓋臥薪嘗膽之是圖。寧拯溺救焚之敢緩。然人命至重。佳兵不祥。靡辭屈己以事讐。姑欲安民而和衆。豈謂冥頑之虜。狃於篡逆之資。以至不仁。行大無道。驅我中原之老穉。窮爲異類之囚俘。仍輕棄於穴巢。輒坐張於畿甸。自謂富強之莫敵。公然反覆以見欺。指麾而取將相之臣。談笑以求淮漢之壤。九州四海。聞之怒髮以衝冠。百將三軍。孰不擐旗而抵掌。幕府濫膺齎。盡護戎旃。當陝右以啓行。嘗展魚龍之效。沿順昌而出戍。復殲蛇豕之羣。冀憑宗社之威靈。一洗穹廬之穢孽。待時而動。歷歲於茲。天亡此胡。使悉身而送死。人自爲戰。不與賊以俱生。帝尊一臨。士氣百倍。吳少保下蜀川之甲。劉相公興京口之師。李四廂虎視於青徐。王太尉鷹揚於亳壽。馬師搗殺函之險。步軍衝伊洛之郊。前無堅鋒。勇有餘憤。以此制敵。何敵不摧。以此攻城。何城不克。惟彼諸蕃之大國。久爲鉅宋之讎鄰。玉帛交馳。尙憶百年之信誓。封疆遐隔。頓疎兩地之音郵。願悼繼好之規。共作侮亡之舉。至於秦晉奇士。燕趙雋才。抱節義之良謀。志

功名之嘉會。爲劉氏左袒。飽聞思漢之忠。後湯王東征。必慰戴商之望。抗旌雲合。投袂風從。或據城以迎降。或聚徒而特起。乘吾破竹之勢。立爾翦茅之勳。侯王寧有種乎。人皆可致富貴。是所欲也。時不再來。更期父老之誨言。深念祖宗之德化。毋忘舊主。重建丕基。檄到如章。書不盡意。又朝廷降黃詔。諭金虜無厭。背盟失信。今率精兵百萬。恭行天討。仰中原官吏軍民等。能以一路歸者。與一路安撫使。以一州歸者。與一州。以一縣歸者。與一縣。所得城邑。除爵賞外。凡府庫所有。盡以給賞。朝廷所留。唯器甲文書而已。內有願別立功效之人。不次擢用。令軍行秋毫不犯。事平後。免租稅十年。一應虜人暴斂。及強奪良人室女。爲奴婢者。當爲放還。深酷之刑。如剝皮族滅。油煎鋸解。鉤脊之類。一切除之。武翼郎知均州武鉅。築山水寨。結土豪。起義軍。自爲攻守計。不藉朝廷軍需芻粟等。招降到僞巡檢杜海。督朝潤二萬人。鞍馬器械亦如之。擢果州團練使。管內安撫使。節制忠義軍馬。十九日。孟焯以順昌降。擢忠州團練使。就知順昌府。奚契丹以衆二千來歸。封賞各有差。二十四日。賊陷信陽軍。二十五日。吳璘將劉海克秦州。擒僞安撫高同知。明威將軍乞永。開奉信校尉室登。劉天使大郎君。二郎君等。俘馘萬計。獲戰馬兵甲器械。莫知其數。二十六日。賊陷光州。二十七日。虜突騎數千犯光軍。守將張起迎戰於上水門北關。敗之。明日再戰。陷之。吳璘將曹沐克兆州。執僞同知昭武大將軍奧屯蟬只等。張彥忠克蘭州。禽僞刺史安遠。大將軍溫都烏烏等。殺之。彭清張惠容克隴州。與賊戰。僞知州盧奉國同知劉昭武竄登涼樓。清等縱火焚之。盡燒其儲積。僞都統合喜勃謹張金紫會陝西諸路兵數萬。據方山原。清等乘勝攻之。賊敗。棄原走。劉錡軍前探報金人。

大發戰艦。蒲臺閱習。將謀入海南寇。以宣州觀察使李寶爲浙西副總管。提領明越諸州海船。率水軍七千往海州屯駐。據其要津。鄂州都統田師中。以醴泉觀使奉朝請罷。除潭州觀察使。吳拱代之。淮南襄漢。盡行清塗。十九日。祀明堂。十月一日。下詔親征。朕履運中微。遭家多難。八陵廢祀。豈勝坏土之悲。二帝蒙塵。莫贖終天之痛。皇族尙淪於沙漠。神京猶汚於羶腥。銜恨無窮。待時而動。未免屈伸而事小。庶幾繼好以息民。屬戎虜之無厭。曾信盟之弗顧。怙其篡奪之惡。濟以貪殘之兇。流毒遍於華夷。視民幾於草芥。赤地千里。謂暴虐爲無傷。蒼天九重。以高明爲可侮。屢因賀使。公肆慢言。指求將相之臣。坐索漢淮之壤。吠堯之犬。謂秦無人。朕姑務於含容。彼尙飾其姦詐。嘯厥醜類。驅吾善良。妖氛澆汨於中原。烽火遂交於蜀道。皆朕威不足以震懾。德不足以懷柔。負爾萬邦。於茲三紀。撫心自悼。流涕何從。方將躬縞素以啓行。率貔貅而薄伐。取細柳馭軍之制。考澶淵克敵之規。詔旨一頒。驩聲四起。歲星臨於吳分。當成涘水之勳。關士倍於晉師。當決韓原之勝。尙賴股肱爪牙之士。文武小大之臣。戮力一心。捐軀報國。共雪侵陵之恥。永肩恢復之圖。播告邇遐。明體朕意。初三日。亮親行營壘。督諸軍戰。衆數十萬。壁淮岸。連營三百里。與官軍對拒。初四日。攻安豐。陷之。分兵四掠。李顯忠將孔福。迎拒于正陽。遇虜萬戶郭副留韓將軍甲士二千。戰於大人洲。敗之。賊復召生兵數千。整陣再鼓。官軍乘勝搏之。虜三戰皆敗。掩殺入淮。死傷略盡。初五日。成閔將張喜。克復信陽軍。初六日。虜兵數千。係簽山東十三州人。用火車載鵝車。天橋。雲梯。及砲架於渡。將攻海州。去城二十里。寨於新橋。李寶潛軍由他道出其背掩擊。沒死於新河者十四五。旗鼓攻具坐獲。

之初七日，吳拱將郝致書，將游擊兵次湖陽，遇賊鐵騎千餘，步軍七百，迎戰於真陂，敗之。武鉅將荀琛將民兵進攻鄧州，遇賊攻於宜男村，敗。初九日，賊潛遣舟師，夜攻劉錡淮陰營，錡將吳超伏弓弩射退。同時又犯清河口，王剛敗之。黎明，虜騎數千直臨大黑口，吳超、李橫多布剋敵弓，沿流迎遏，虜別選精騎萬餘，乘戰舸，從十八里河入，與錡決戰，自卯至酉，殺傷相當，賊遂退。麟北岸，錡潛渡銳卒，出其不意，往襲之，掩殺入淮死者不可勝計，盡獲糧船軍須等。初十日，結筏渡淮，攻濠州，陷之。王權以賊勢初銳，彼衆我寡，未可與爭鋒，退屯廬州。時劉錡方守淮東，俾權屯淝水，以遏淮西之衝。權既失利，退師，錡亟遣姪汜將步騎五千援之，別令死士千人往斷浮橋，至皆陷於賊。汜單騎馳還，遂陷廬州，權退屯和州，留步將姚興拒之。十一月，與賊戰於定林，斬首數千級，擒其千戶鵠，殺虎，賊益兵攻之，興提孤軍無援，戰鬪數十合，士馬饑疲，既與權相失，亦復引而南，且行且戰，賊遣騎語興使降，興不從，遂戰死。十三日，賊攻和州，權將戴皋勸兵迎距，賊圍之數重，權令任旺等應援，虜遣游兵遮絕之，旺率麾下奮擊而前，殺數百人，救皋出，賊衆稍卻。皋旺併兵追擊於尉子橋，敗之，遂解和州圍。十七日，賊復益兵攻和州，陷之，權退保采石，棄軍須兵仗，不可勝計。軍民爭舟，溺死於江者十四五，權編管瓊州，以兵屬李顯忠。劉汜編管英州，賊衆二十餘萬，既陷淮西數郡，遂分兵掠地。十九日，陷真州，直趨揚州。劉錡中軍統制邵宏淵將游擊兵數千，遇揚子橋，與之夾水陳，雨矢交下，晝夜相持三日，故賊不得東。時錡全軍在山陽，與賊對壘，而揚州無守備，徽宏淵則陷於賊，錡腹背受敵，進退失據矣。二十一日，錡棄楚州，陷之，還屯揚州。二十二日，賊攻揚州，陷之，錡敗績。

退保瓜洲渡。二十三日降詔。朕德不足以懷遠人。致金人復叛盟好。勞我將士。蒙犯矢石。朝夕念之。坐不安席。食不甘味。自今月二十四日。當避正殿。減常膳。以樞密院葉義問。除督視江淮軍馬。中書舍人虞允文。朱夏卿。參贊軍事。戶部侍郎汪應辰。充浙東沿江制置使。兵部侍郎陳俊卿。除浙江沿江制置使。各措海船。戶部侍郎劉岑。充浙西淮南江東四路發運使。督水陸漕運。以餉諸軍。張浚復觀文殿大學士。召知建康府事。二十六日。虜高萬戶率騎八千。來犯瓜洲。錡時病嘔血。遂肩輿力疾。督戰於阜角林。前鋒將敗。錡先登陷圍。下馬死鬪。二十餘合。破之。賊益生兵。張左右翼。掩襲於後。錡遣中軍游奕統制邵宏淵。併力禦之。血戰自卯至申。賊敗引去。橫屍二十餘里。侍從臺諫疏乞親征。詔步軍帥李捧。除御營前軍都統。率本部兵駐江口。太傅和義郡王楊存中。除御營宿衛使。卜二十九日。車駕進發。右僕射朱倬。楊存中。固諫止曰。賊狃於新勝。其鋒方銳。乘輿未宜輕動。萬一王師小跌。或致驚擾。爲害非細。不若且令諸將併力禦之。賊之遠來。利在速戰。宜堅壁以剄其鋒。俟其沮解。一鼓乘之。可以得志。侍從臺諫皆謂不然。昔澶淵之役。眞宗親幸軍前。契丹之師。不戰自潰。紹興之初。趙鼎。張浚。力勸親征。敵遂退走。今乘輿宜速啓行。以振士氣。賊聞必少卻。乘我士氣。破之必矣。存中曰。澶淵偶斃其統軍。敵遂引退。豈可因昔時之幸勝。保今日之成功。上猶豫未決。存中乞躬往江上。覘事勢。與諸將合議。以聞。上許之。十一月五日。存中抵鎮江。劉錡夜潛謁議事。令李橫守瓜洲。賊覘錡渡江。輕兵來襲瓜洲。橫自爲先鋒。擊敗。進兵追之。遇伏。身被數鎗。幾不免。遂奮擊。冒圍以出。還保瓜洲。初六日。賊攻宣化渡。邵宏淵擊敗之。初七日。復攻奪瓜洲。宣化二渡甚。

急。錡嘔血疾篤。遂棄瓜洲。退守京口。沿流諸處要害。亦皆棄之。退屯江南。至是皆爲虜所得。葉義問召錡。責讓曰。瓜洲咽喉要害。當以死守。促令進兵爭之。錡曰。官兵連日苦戰疲勞。又衆寡不敵。賊新勝氣銳。未可與爭。宜併力守江。蓄銳待之。義問怒曰。君爲大將。提十萬衆。怯於一戰。昔之智勇安在。遂取錡招討印。舉示諸將。曰。能爲跨江一戰者。當以畀之。功成奏以重賞。數問無應者。於是李橫請行。乞兵三千。義問與之五千。錡曰。未見其利也。更以三千爲援。至皆沒於賊。橫僅以身免。遂罷錡兵。以醴泉觀使奉朝請。擢其弟銳爲鎮江都統制。領錡所部兵。成閔改除浙西江東淮南路制置使。京畿河北東路招討使。吳拱除湖北東西路制置使。京西河北兩路招討使。李顯忠改建康府都統制。除亳壽招討使。李道權節制池州軍。馬亮時在和州。聞王師退保。親提銳衆。駐西采石。分布戰艦。直欲衝突濟江。李顯忠列步騎及水軍。陣於采石東岸。舸載甲士。增以勁弓硬弩。沿流禦之。乘其未備。濟師西岸。焚燕賊舟。進兵急擊。大破之。賊還保和州。亮旣下淮南諸郡。獲官私儲積。足以持久。又以江南屯守甚堅。未可輕越。遂保據揚州。增築濠壘。嬰城自固。僞改爲新德府。又改眞州爲新德軍。封僞元帥。大懷忠爲淮南王。其餘僞官。皆論功遷職。有差。各屯駐重兵。分據沿江要害。剋城於瓜洲。窺伺攻劫。芟地植麥。爲來年攻守計。初。劉錡之守揚州。披城立營柵。欲爲虜确。俾淮南諸郡皆清野。盡斂公私儲蓄入城。百姓咸倚錡爲安。及錡出戰。百姓自後負糗糒。拾遺矢以助軍。錡旣失利。皆爲賊所有。強壯婦女悉驅之北去。餘老弱者。刳目以還錡。哀痛之聲塞路。亮雖據揚州。遷徙不定。所居之帳。以木爲城。其法用厚板。冒以牛革。鐵鋼其端。層壘如屏。周匝環互百餘丈。楚

嬪妾實其內。日夜宴樂。以逞得志。一日大宴羣下。酒酣。顧謂左右曰。唐李靖伐蕭銑。乘水潦以進師。謂震雷不及掩耳。朕今已詔發戈船。由海道直趨杭州。想大軍到日。出彼不意。破之必矣。此司馬公所謂神兵從天而下也。時亮已簽發女真渤海大漢軍二萬。山東水軍一萬。大艦四百艘。遣榮祿大夫工部尙書蘇保衡爲軍都統制。驃騎上將軍益都府總管完顏鄭禮副之。神鋒軍總管輔上將軍蒲登。神鋒軍副總管昭毅大將軍阿兀。威震軍總管昭毅將軍都水使者孟斌。威震軍副總管寶遷。大將軍御前引進高什爲將佐。寢殿小底武義軍將軍都水使者小名不識爲監軍。并熟知海道人忠翊校尉倪詢。承信校尉殷簡。詢平江人。簡通州人。因罪捕急。遂竄於虜。以其熟知海道。各捕官用之。自密川膠西入海南寇。僞札付蘇保衡等。汝等端的問道途遠近。約度里數。神速起發前去。限十一月十四日已後。十八日已前。此五日內須管夜半過海門山。天將明時湧入杭州句當。內指斥語不書。莫殺無辜之人。不得打虜。密封府庫。訖急走馬過江。奏知不得分毫怠慢。悞事。定江南後。依等第重加賞例。內有打奸不向前逃亡之人。盡行處斬。諸軍等各宜盡心。不得有違朕意。十月二十七日。晨發膠西。鉦鼓震天。旌旗蔽日而下。李寶率水軍七千。督戰艦往邀擊之。時西北風急。王師未果。泊於唐家島。賊乘風張帆。順流南駛。始出膠西港。忽東南風轉。寶將曹洋分布戰艦。遮賊要路。乘風衝擊。彼軍皆怯水鬪。不戰而降。惟女真軍猶力拒。洋因風縱火。帆艦皆著。烟燄亘天。死者不可勝計。餘衆捨舟登岸。狼狽駭走。追戮殆盡。生擒三百餘人。降大漢軍三千餘人。山東水軍數千。盡獲器甲軍須等。捷奏上大悅。除寶靖海軍節度使。兩浙路通泰海州沿海制置使。京西河北招討使。將佐並遷十官。遣內侍陳

子常、費茶藥金器等。賜詔獎諭。初八日，李顯忠分遣騎二萬，數路攻劫賊寨。部將崔定破賊巢縣屯，獲級數百。禽女真千戶會達。漢軍千戶賀陽生李謹克復無爲軍。趙端破賊三大寨於廬州。西蜀山賊敗還。保廬州。背城堅柵以守。端選士二百，銜枚夜斫其營，盡焚其柵。賊復入保城。十五日，端進薄其城。賊出搏戰，又敗之。十七日，王彥拔商州。禽僞知州昭毅大將軍完顏守能。同知武騎尉馬彥千戶。信武將軍潭遠、安遠軍阿華降。女真軍千人。別將任大錫克饒州。又克華州。獲同知昭武大將軍韓端愿。信武將軍韓銘。成閔將趙樽克蔡州。成方將張寶克光州。追北賊將蕭安撫於淮口。又敗之。十八日，順昌復陷於賊。孟炤死之。亮盡屠居民邑屋。戒其降於我也。二十日，李道敗虜將劉萼兵數千。克復光化軍。二十五日，賊攻秦州。王剛迎戰敗之。禽渤海千戶李偉僊。二十七日，復益兵來攻。陷之。剛敗奔通州。二十八日，賊攻通州。不克。是夕，亮被弑。年四十。在位一十四年。初，亮之謀南犯也，經營數年，製造海船，教閱水軍，欲奪南人之長技。志於必取。及遣師入海也，決期破臨安。然後進兵渡江。舟師旣爲李寶所敗，遂失望。又沿江屯戍甚堅。未易輕越。因是憤怒，拔劍斫几，促令作筏渡江。誠以初三日畢濟。不然，將佐盡行處斬。僞臣有進說者，謂長江之險，可敵二百萬甲兵。況爭舟楫之利，非北軍所長。安可剋期取勝。當老之以歲月，乘其虛隙可也。亮曰：「當時四太子何故過得去，而我不可過耶？」立斬以徇。左右皆震懼，不自保。羣下相爲謀曰：「若至期不果，我曹無逃死矣。」莫若先計圖之。遂謀於是夜二鼓，詐爲捷齊入報，稱前軍已渡江。南軍皆潰。亮方醉臥，聞奏至喜，自帳中躍出，遂遇弑。衆軍皆亂。先是亮以女真親軍居帳下，皆給好衣糧，仍不使出戰。所當鋒

鏞者皆中原及諸國簽軍。又所給麤糲，率多怨憤。是夜衆乘其亂，悉舉火燒營，棄兵而潰，相蹈藉死者十
四五。喪器甲軍須糧草，騾馬牛畜等，不知紀極。止有女真兵數萬，向爲之屯守。大懷忠盡統之，閱數日，虜
相張浩奉僞太子光英，護亮喪還汴，帥其餘衆結陣而去。亮一日登揚州望江亭，指顧江山之勝，謂其下
詩於壁曰：萬國車書久混同。江南何尙隔華封，提兵百萬
西湖上駐馬吳山第一峯。蓋不歸之讖，已是先見之矣。

中興禦侮錄卷下

亮立十四年卒。兄襄立。改正隆六年爲大定元年。廢亮爲岐王。諡曰煬王。襄卽魯王撻辣之子。葛王也。始亮之篡竄也。盡封諸叔兄弟及功臣戚里。以安其心。後疑其有圖己者。漸誣以罪。誅滅之。襄恐禍將及己。遂佯墜車傷足。稱疾不朝。還其封邑。由是獲免。亮旣遷都於汴。方事南牧。未暇北顧。而蒙古撻鞬等國。連兵入寇。遂起襄留守燕京。督師討之。亮遇弑。衆遂推而立之。襄性外寬內和。沈鷺有深謀。當亮時。刑罰過差。下多離怨。襄傾財賑之。結納豪右。以收衆心。由是士多歸之。或云。亮之弑。襄有謀焉。時有盱眙軍老兵至燕京。凡數月。後歸云。有耶律阿粟者。亦預殺亮。襄立。還爲左平章事。三十日。軍前准大僉都督府牒。國賜姓完顏。結爲兄弟。同謁太廟。仍於宗正府著姓籍。據此。又出襄謀也。朝自太祖皇帝創業開基。奄有天下。迄今四十餘年。講信脩睦。兵革浸息。不意正隆失德。師出無名。使兩國生靈。皆被塗炭。今奉新天子明詔。已從廢殞。大臣將帥。方議班師。赴闕。宜各戢兵。以悼舊好。軍前用督視軍馬府牒回之。承來文爲正隆失德廢殞事。除已具錄奏聞外。須議移文牒。請照會。十二月初三日。成閔進屯瓜洲渡。李顯忠進屯采石渡。邵宏淵進屯宣化渡。初五日。邵宏淵收復眞州。初六日。成閔收復揚州。初八日。收復高郵軍。初十日。收復楚州。十二日。克盱眙。凡言克者。戰而得之。言收復者。不戰而賊自棄。我得之。就取之。餘寇皆奔北渡。淮已濟未畢。閔令死士潛斷浮橋。大軍三面掩擊。溺淮死者不可勝計。時自亮死。淮東諸城守賊。拔寨盡去。懷忠止留僞相張浩之子。統積兵二萬。據和州爲殿。李顯忠依險列營。瞰臨城壘。薄城以攻。賊引衆宵

遁。顯忠選輕騎五千，追襲於橫山澗。賊反旗鳴鼓，縱驍騎搏戰。官兵併力鏖戰，虜衆大敗。橫屍蔽野，盡獲其輜重。克復和澌州。十五日，成閔潛師濟淮，夜攻泗州，克之。獲被虜老弱數千以歸。邵宏淵收復廬濠州。乘勝追賊，戰於白陵橋，敗之。夜遣師追北，遲明抵淮口。乘賊半渡，縱兵掩擊，又敗之。十六日，趙樽拔陳州。執同知完顏耶魯等。吳拱將劉革克鄧州。牛完克汝州。十七日，武鉅克嵩州。降詔朕以逆亮淪盟，侵犯王略，肆願詔旨，躬往視師。久已戒嚴，屬茲進發，凡遠邇股肱之郡，文武大小之臣，宜體朕心，各修爾職。毋虐善良，毋事征求，毋擾獄市。內則輯甯於郡部，外則式遏於寇攘。共濟大勳，永底丕乂。故茲詔示，想宜知悉。初十日，車駕進發，以觀文殿大學士湯思退留守宮闕。二十日，皇帝勞軍於鎮江。李寶、李橫不受賜予。寶曰：海上捷非臣之功，劉錡指蹤也。錡旣被出，臣不敢獨被上賜。橫曰：瓜洲之勦，非錡之罪。錡時疾篤，實臣橫主兵務，以連日格鬪，馬困兵疲，度不可支，遂退保江南。而葉樞密召錡責讓，必欲再戰。錡力陳不可狀，葉不聽。遂奪錡招討印付臣橫，令再戰。遂致失利，罪實在臣。因嚙臂流血，以明錡非辜。又諸軍皆不樂義。聞於上前，率多怨言。於是罷義，樞密督視軍馬饒州居住。罷橫兵職，爲浙西副總管。二十三日，勞軍于建康，駐蹕行宮。二十四日，安豐守將孫顯忠收復壽春府。二十五日，德音曲赦揚泰真楚濠和廬濠光州盱眙光化無爲安豐信陽軍，僞鳳翔太守張中彥，遣使詣吳璘軍納款。願舉陝西五路來歸。詔除少保鳳翔府節度使，賜予良渥。及趣其覲，則辭不奉詔。任契丹以衆二萬降，首令除檢校少保。口口軍節度使，賜姓名曰王友直。旣入覲，擢殿帥。三十二年正月八日，賊攻陳州，陷之。守將趙樽退屯蔡州。十二日，蔡州復

陷於賊。楹以城池不堅棄之也。嵩州復陷於賊。二十三日、皇帝宴百官於行宮、賜予各有差。二月十八日、車駕還自建康。二十日、留守湯思退判紹興府。二十八日、虞允文除兵部尙書、川陝宣諭使、鎮江都統制。劉銳罷爲浙西副總管、以軍節度使張子蓋代之。江州都統制戚方罷、以兵屬李顯忠。閏月八日、賊寇興元。時姚仲守關、與賊對壘葦山結營、益張疑兵、與仲相望。夜潛軍由間道入、直攻興元等處、分遣輕兵襲擊仲後、不虞其至。蒼惶接戰、賊疑兵復自關口入、兩面合擊、仲敗、棄關走。賊遂乘勝攻掠旁郡。蜀爲之震。吳璘引兵燒絕棧道、與仲悉師夾擊、大破之。盡坑其餘衆。復進兵守關。初九日、汝州復陷於賊。十二日、劉錡卒。詔贈少師。十三日、僞青州總管以萬騎來攻海州。李寶出兵三千接戰、敗之。江淮大疫、人畜死者幾半。襄遣驃騎上將軍元帥府左監軍高忠建、通議大夫尙書禮部侍郎張景仁、充報諭登寶位使副來聘。詔左司郎中洪邁、知閣門事張掄、接伴邁等。次盱眙、虜移劄文、欲仍舊淮水中分爲界、以迓使。邁等貽書謂昔兩朝通好、約割淮爲境、故彼此送迓使者、皆以中流接見。今兩國旣交兵、則是大義已絕。況本朝所得州軍、乃是去歲爲岐王南侵之時、用師克復者、當爲我疆何疑。如泗州臨淮虹縣等是也。今當以虹縣爲我界。宿州爲彼界、各於此處送迎使者可也。於是始從。又不肯用敵國禮見。邁等辭不敢納。五返介議而後定。二十一日、各立營幕於兩界首。虞姬墓以見。三月十一日、忠建等入國門。十三日、送見。凡有所詢叩、則辭以奉命報登極而已。餘非臣敢任也。又曰、本朝皇帝寬仁愛物、儻貴朝遣一介之使往議、則無不可矣。十六日、陞辭、詔遣洪邁借兵部尙書張掄、借山東道節度使充賀登寶位使副、以報聘。且以三事爲

請歸欽宗梓宮及天眷一也。還河南故地二也。罷臣禮及歲貢彼此用敵國禮三也。十七日參政楊椿罷。汪澈召赴闕。十九日吳璘克環州。禽僞知州中憲大夫郭裔。二十日克會州。姚仲克原州。獲同知鎮國上將軍訖石烈訛魯古等。二十一日虢州復陷於賊。四月十二日賊攻海州不克。益兵圍之。李寶來乞師。張子蓋率兵五千赴援。二十一日子蓋出兵接戰。敗之。斬首數百級。解去。二十三日建康府留守張浚兼經制兩淮事務。五月六日汪澈除參知政事。成閔李顯忠吳拱並召赴闕。二十三日吳璘將王宏克熙州。禽僞上將軍劉嗣初等。斬首七百級。二十四日殿帥趙密以醴泉觀使奉朝請罷。步帥李捧以浙西副總管罷。二十六日成閔除殿帥。李顯忠除馬帥。吳拱除步帥。七月二日右僕射朱倬以觀文殿學士罷。初四日册皇子建王爲皇太子。十一日降詔。朕宅帝位三十有六載。荷天地之靈。祖宗之福。邊事寢甯。國威益振。惟祖宗傳序之重。兢兢焉。恐不克任。憂勤萬幾。靡遑暇逸。思欲釋去重負。以介壽域。蔽自朕心。亟決大計。皇太子某。賢聖仁孝。聞於天下。周知世故。久繫民心。其從東宮。付以社稷。惟天所相。非朕敢私。皇太子可卽皇帝位。朕稱太上皇帝。退處德壽宮。皇后稱太上皇后。一應軍國大事。並聽嗣君處分。朕以澹泊爲心。頤神養志。豈不樂哉。尙賴文武忠良。同德合謀。永底於治。故茲詔示。想宜知悉。是日皇帝卽位。十三日大赦天下。二十一日詔求直言。二十三日召張浚于建康。二十四日李寶以海州孤城難援。疲於轉餉。盡平其城壘。徙居民渡淮而南。退屯楚州。二十九日皇帝詣德壽宮。上尊號曰光堯壽聖太上皇帝。壽聖太上皇后。七月六日張浚除少傅。江淮宣撫使節制諸路軍馬。改封魏國公。中書舍人陳俊卿參謀軍事。兼權

知建康府參政汪澈除督視京西湖北招討使李顯忠除淮南招撫使張子蓋除淮東招撫使李寶罷爲浙西副總管以兵屬子蓋責其擅棄海州也詔子蓋復屯海州增繕城壘以守之興元帥罷責其關口之敗也二十六日吳璘分師大出次於三皇與賊合戰敗績喪器甲軍須莫知其數銳兵驍將亡沒略盡環原數郡復陷於賊退屯德順軍八月一日洪邁張掄使大金還初六日史浩除參知政事十二日賊圍德順軍吳璘堅距之二十日復盡銳來攻璘出兵接戰互有殺傷賊遂退引寨柵數千環城瞰守璘亦嚴守備更脩東山營堡乘城以距九月一日僞都統完顏節度使別自渭州選精騎數萬并城下兵分爲二軍攻南門一攻東山堡璘親臨戰陣分遣吳挺吳勝併力禦敵血戰自辰至酉盡焚其攻具二十日洪邁張掄並放罷責其奉使辱命也邁等六月十日至燕京館於會同館褻遣兵部侍郎高文昇等接伴持所與國書及二使沿路謝表來還云禮數未是不敢受請依前來禮例國書用表國信稱陪臣方可不然臣下不敢奏知皇帝邁等對曰昔本朝皇帝所以不憚卑屈者以太母欽宗之故也太母欽宗旣已上僊本朝皇帝又以兩國生靈之故不欲違違盟好姑循舊例去歲岐王首覆盟信無故與師兩國旣已交兵則是大義已絕安可復舊禮哉文昇等曰昨岐王無道師出無名已從廢殞矣今主上仁慈聖德豈可復與岐王比哉若國信早換表來當卽爲奏知有所議事庶得早畢不然恐國信卒未得見皇帝亦未有還期邁等曰奉命出疆而擅易國書當若是耶且如侍郎他日銜命出疆還敢以朝廷圖書擅自更易否相與辨論至晚不決文昇等去亦不具頓膳邁等皆不食者經夕至十二日文昇復來云不知已換書否邁等云

斷不敢易。又云：若國信堅執不從，恐爲國別生事。遣等對曰：奉命一介使耳，若貴朝必欲生事，無過見留及一死耳。復爭辨久之，文昇怒，遽揖去。云：國書旣不可見，國信謝表亦不可見耶？請更從長計議，無貽後悔。文昇旣去，遣等議曰：國書旣已力爭見聽，如換表乃吾臣子之辱耳，自可從。泊晚，文昇復遣介至，遂署表。國書與之去。俄頃使押宴，至日已夕矣。至十五日，方見喪首，責以國書之禮非，所請三事皆不見允。且言大臣議欲留卿輩，朕以卿將命遠來良勞，姑且歸之。歸爲朕語，儻以舊境見還，復篤鄰好可也。遣等唯唯而退。時河南蝗螟大起，聞蕭和尙據太原，大懷忠據河南，紅巾蟠結山東，契丹別立新主，稍侵其邊邑。襄方調兵討之。二十九日，詔遣中書舍人劉瑛、知閣門事張說、充報登寶位使副往焉。泊抵界，虜移文若割還舊境，盡復舊禮歲幣方許，不然不敢納使。於是遣介往來，辨論幾月，不納而還。十月十二日，張子蓋招納契丹首領七人，餘衆萬餘，分隸諸軍，皆與金人戰敗之師也。首領並除節度使。子蓋除檢校少保。十一月十四日，張燾以同知樞密召。二十七日，左僕射陳康伯兼判樞密院，封信國公。十二月一日，張燾見於內殿，詔免拜。上諮以時務，燾占對數事，率以脩內攘外爲言。優詔褒之。月正元日，改元隆興。初九日，參政史浩拜右僕射。張浚罷宣撫除樞密使，都督江淮軍馬。張子蓋卒，復以其兵李寶統之。三月一日，王琪權殿帥。馬彥忠權馬帥。郭威權步帥。成閔落節鉞，以提舉台州崇道觀罷。婺州居住，閔之下泗州也。寡婦孫有美色，因私致之。其兄宜訴於朝，故有是命。初三日，同知樞密院張燾，以提舉佑神觀兼侍讀罷。蓋其力辭以老，屢章乞出也。二十八日，詔求遺逸。四月三日，張浚詣闕奏事內殿，上以攻守和三事訪之。浚對

攻則勝。守則弱。和則亡。仍乞於五月進師。上從之。史浩因諫不可。曰。方今財用匱乏。將士寡弱。未易輕舉。宜以和爲虛聲。守爲實務。俟數年之後。兵強食足。然後圖之。方此盛夏。進兵未見其利也。浚曰。周宣王六月北伐。諸葛亮五月渡瀘。皆因天時而取勝。蓋機會不可失。今天時向暑。北人畏之。南人得之。此利在我。若圖進取。可省二十萬衆。又南兵多步。北兵多騎。若不乘此以對敵人。至秋冬。士健馬肥。彼旣得利。豈不困哉。廷臣咸贊其說。遂決議進師。十一日。張浚陛辭。詔百官祖於郊。史浩旣議不合。力辭引去。以觀文殿大學士判紹興府。尋奉祠罷。二十一日。同知樞密辛次膺罷。五月二日。洪遵除同知樞密院事。初四日。李顯忠。邵宏淵。進兵渡淮。初六日。至徒溝。虜右翼統軍蕭琦。出兵迎戰。敗之。初七日。至靈壁。蕭琦復整衆來距。前鋒馬軍統制張師賢。旣戰被圍。顯忠命曹高麥。將游擊兵往援。合戰。自己至未。敗之。當陣殺死并降者三千餘人。初八日。邵宏淵圍虹縣。克之。琦將蕭僞。知州蒲察徒穆。同知大周仁。率官屬部落千人降。宏淵除檢校少保。顯忠加開府儀同三司。降詔。朕惕膺睿訓。祇遙炎圖。永惟國步之艱。越在海隅之阻。聞者亟馳於使驛。庶幾少戢於兵鋒。而邊候屢驚。敵情未革。旣搖蕩於秦隴。復窺伺於荆襄。念億萬姓之黎元。久遭殘虐。慨二百年之陵寢。莫獲薦陳。復奮勵於諸軍。以肅清於舊壘。靡待前茅之警備。將效細柳以勞軍。副上皇與子之心。據列聖在天之憤。肆譖龜茲。躬御戎軍。眷言清蹕之初。申飭攸司之衆。各修乃職。明聽朕言。毋徭役以煩民。毋誅求以剝下。佇成嘉績。迄底丕平。咨爾內外。體予至懷。可令有司排辦。候秋涼擇日進發。故茲詔示。想宜知悉。十四日。官軍圍宿州。虜左翼都統提步騎五萬。列陣城西南。搏戰。自己至。

酉。賊敗引去。十六日。諸軍傅城下。旦乘霧氣。併力急攻。不移晷刻。拔之。生禽麻葉萬戶七人。柳葉千戶。僞官等二十餘人。女真奚契丹等兵八千餘人。盡戮之。城東隅。十七日。都督移屯泗州。十八日。僞李撒元帥自應天府。選精銳兵十萬。出城二十里立壁。與官軍對距。是日。督府移文軍前。邵宏淵可聽李顯忠節制。宏淵怏怏不樂。十九日。復移文軍前。顯忠宏淵同節制諸軍。自是兩將之權各專。始相矛盾矣。二十一日。虜帥列大陣城南。與官軍合戰。兩陣交鋒。顯忠部將李福。李寶。各擁所部兵。退走櫻桃林。觀望不進。顯忠宏淵遂親戰陣。督將士血戰。自辰至酉。敗之。福寶並斬首以徇。二十二日。賊益生兵與官軍再戰。殺傷相當。顯忠見陣勢危急。遽脫去兜鍪。持大斧。躬入賊陣。奮擊。殺數十人。臨陣斬虜左翼統軍千戶等。賊衆大敗。退營四十里。顯忠宏淵亦斂兵入城休士。是夕。諸軍忽譁爭金帛。委棄兵仗。相繼潰散。顯忠聞亂。率麾下親信。揚言劫寨而出。賊衆大敗。退徹服雜士伍中。潛奔泗上。士卒亡者大半。喪器甲軍須。不可勝計。時虜營望見城中列炬。鼓譟出兵。謂將襲己。皆散走險。明旦。覘知稍復來集爭城。宏淵遂收餘衆。與賊巷戰。敗績。還保泗州。宿州復陷於賊。二十七日。都督還屯揚州。招集散亡。頗多歸者。六月四日。下責躬詔。張浚上表待罪。詔奪兩官。邵宏淵罷節鉞。李顯忠責濠州團練使。潭州安置。始顯忠宏淵之出師也。督府諭以若下城邑。所得金帛。盡給戰士。泊得宿州。府庫甚充。顯忠斬之。止微行犒勞而已。遂具數十舟。聲言將獻諸朝。宏淵力爭不聽。故其下多缺望而怨之。一夕。憤起。爭攫取相攻。斬關而遁。顯忠聞亂。徹服潛奔。宏淵又戰敗績。故有是命。降將蕭琦。蒲察徒。穆大。周仁。並除節度使。參政汪澈。罷督荆襄軍馬。提舉江州太平。

興國宮。溫州居住。用言者責其培克軍士也。二十七日。湯思退拜右僕射。封榮國公。周葵除參知政事。七月二日。太白晝見。宰執抗章乞出。不允。八月十日。督府准虜帥移文。欲脩和好。張浚以其事聞。詔機辨者往議。督府薦布衣盧仲賢。李適往。並借宣教郎樞密院計議官使焉。十月。安遠軍節度使劉寶除鎮江都統制兼淮東招撫使。十一月二日。盧仲賢等使虜軍前還。仲賢等以十月一日至汴京。見虜大元帥大懷忠等。議欲求割河南地。及所與大金歲幣如祖宗舊與契丹數。彼此用敵國禮。各不還歸附人。四事爲請。而虜使從其二。內割地歲幣二說不見聽。謂若盡還所侵地。依舊畫淮爲境。及歲幣如秦檜所許之數。方可。仲賢等與之辨論數日。卒如其議而歸。至是還闕。詣都堂白其事。二相大怒。謂虜人國書用舊禮。而能力爭。又擅許割地及歲幣數。遂下二人大理獄。詔遣權吏部侍郎王之望。知開門事龍大淵。充和議使。復往議焉。中書舍人劉珙奏乞無遣使與之和。上不納。明日。殿中侍御史周操復如前入奏。上詰其說。操對今虜帥以咫尺之書至督府。而朝廷遽命從臣往報之。萬一見欺於彼。則輕傷國體。貽笑夷狄。莫若止令督府貽書答之。然虜謀詭秘。未足深信。使其強也。雖求與之和亦不可得。使其弱也。自當羈而廢之。何和之有。且和議乃虜自便之計。方其未暇爲寇。則坐享歲幣。稍有餘力。則背盟改圖矣。宰相陳康伯湯思退曰。今連年宿帥。國用彫弊。歲給諸軍。調度動億萬計。較之與金人聘幣。方什一而已。又今歲王師有宿城之潰。兵威不振。豈不戒自焚之漸哉。今因其請。從而許之。尤爲良便。若謂不可遣使。則和議何由可成。操與之爭。累日不決。上命給筆札。集百官於都省。各言和戰利害以聞。自宰執侍從。皆言和爲便。餘皆首

鼠唯操與諫官胡銓數人固執不可。上前力抵宰相之不善處事。至有倍禮要君之誚。於是宰臣陳康伯、湯思退、參政周葵、同知樞密院洪遵、並乞解機政。疏屢上。皆優詔不允。二十四日、張浚召赴闕。十二月一日、陳康伯以少保觀文殿大學士判信州。尋奉祠罷。初三日、張浚見於內殿。上以宰執臺諫互有異論。俾浚決之。浚意亦不欲和。但乞脩守備耳。而太上皇帝深勸上令從和。遂決議遣使。銓等猶力爭不已。初九日、詔別遣胡昉、楊由義充審議。並借宣教郎先往焉。虜人果有求和之意。則遂遣王之望等往議。或不然則已之。二十七日、昉等入虜界。二年正月五日、張浚拜右僕射兼樞密使領都督如故。十一日、昉等見虜元帥大懷忠於汴京。懷忠等與數人環坐府中。辭禮倨甚。北鄉坐昉等於庭。首問南朝已許割還我侵地。歸我叛亡及歲幣如舊數。今汝等復來何議。昉等對曰。此特元帥所欲耳。本朝初未嘗許也。昨盧仲賢等還云已議定。各不還叛亡。止是歲幣與契丹舊歲約爲叔姪之國耳。懷忠云。仲賢已有供認文字在此。遂取以示昉等云。仲賢擅自妄許。豈足憑信。況彼使還日。持貴朝所回國書。用舊禮不爭。尙且重寘憲典。況此將命失辭。朝廷聞之。豈得不行誅竄。懷忠復云。昨爲南宋所侵地。我已漸取了。止唐鄧海泗尙在彼。我若出師便可得。但惡多殺耳。宋朝若以生靈之故。善割地還我以約和。此萬世之利也。不然。江南兵弱民困。豈所利哉。昉云。昉等之來。止奉命審議而已。審貴朝果有尋盟之意。則朝廷已差王之望至此議矣。餘非昉等敢任也。懷忠曰。宋朝若欲求和。非以此見從不可。昉等曰。所謂和好。初非本朝求之。以元帥先移文督府來故也。本朝皇帝恐爲貴朝見欺。初不肯遣使。而太上愛惜生靈。不欲杜絕來命。謂旣約不還叛

亡不歸侵地。故遣昉等來審之。今元帥復有此議。是果無意於和。特見欺耳。又與之反覆辯論。殊不少屈。懷忠大怒。命吏引昉等出。被以桎梏。幽窟室中二十餘日。累使人說誘。必令承伏。昉等以死固執不可。至二月二日。以虜主襲命釋歸之。三月一日。還闕。見於內殿。上面加慰獎。昉始以迪功郎由義以從義郎往。至是並改通直郎。昉除軍器監丞。由義除知審計院。盧仲賢、李適並除名刺配。朝廷以金人既因辱使命。審和議不可成。遂罷王之望。使命不遣。初五日。詔左僕射張浚復往兩淮督師。經制邊備。而左僕射湯思退猶主和議。屢與浚上前爭論。由是交隙。浚行始逾旬。思退即奏遣戶部侍郎錢端禮爲淮東宣諭使。權戶部侍郎王之望爲淮西宣諭使。俾申飭諸軍。無得妄舉。又諷諫官尹穉論列浚罪。章數上。皆優容之。時浚方董督戎事。規畫進討。而兩宣諭至。戒無妄動。浚大沮撓。又聞穉彈章數上。遂請去位。乞罷督軍。仍與子栻俱丐致仕。詔從之。浚遂以少師保信軍節度使判福州。辭疾不行。尋以醴泉觀使罷。思退遂獨領三省。專意主和。稍排斥異己者。所有軍功賞典。抑而不推。諸將之爲用者。盡易置閒散。禁民間敢言邊事者。悉從軍法。遂使降人反側不安。軍士爲之憤怒。諸將邵宏淵者。最爲忠勇。得士心。王之望迎合思退意。劾其侵欺官錢三萬餘緡。更代之際。鼓唱士卒喧嘩。遂責宏淵南安軍安置。思退又將沿邊備禦之具。盡廢弛之。遽撤唐鄧海泗戍兵。罷築壽春城。散萬弩營。輟脩海船。毀拆浚所築水堰。欲以此示信於敵人。時虜主襲聞之。亦命罷元帥府。蓋襲自得位後。一切懲亮所爲。深厭兵禍。日謀脩好。而二帥久握重兵。不欲一朝釋去。故堅持戰議。後大元帥大懷忠者。雖意在猖獗。自願兵糧之乏。恐志不遂。又以虜主決議從和。不

欲重違。囚寢其計。遂議遣書來約和。而副元帥紇石烈志甯者。力爭不從。於是二帥始相矛盾矣。六月十五日。錢端禮遷戶部尙書。王之望遷左諫議大夫。依舊宣諭兩淮。七月二日。同知樞密洪遵。以端明殿學士提舉洪州玉隆觀罷。八月。懷忠遣約和書至軍前。詔遣戶部郎中魏杞。知開門事康誥。充通問使往焉。及境。志甯拒不納。需索百端。動輒起釁。退換國書。至於屢易。邀求金帛。必如舊數。又求割唐鄧海泗之地。朝廷悉皆從之。又渝元約。復求商秦之地。遣使往來商議。幾月不能決。朝廷始疑之矣。九月十三日。賀允中王之望並除參知政事。十六日。張浚薨。贈太保。允中既與羣議不合力。抗章引去。遂以資政殿學士提舉江州太平興國宮罷。二虜帥既異議交際。不復相下。志甯遂憤然揮其衆壓境。撫求割商秦。請還叛亡。不獲爲釁。復有借兩淮收馬之言。乘我無備。遣游騎渡淮。侵掠濠州。守將孔福。知盱眙軍郭淑。望風奔北。兩淮爲之震擾。上怒。淑編管靜江府。福削奪在身官爵。令白身自効。思退愧悚不自安。遽請出爲督軍。十九日。詔思退都督江淮軍馬。太傅和義郡王楊存中副之。淮東宣諭錢端禮兼參贊軍事。參政王之望爲淮西安撫使。戶部尙書韓仲通。知鄂州兼湖北。京西制置使。吳璘都督川陝軍馬。王琪淮南江東西制置。招討使。張守忠。湖北。京西制置。招討使。按兵待之。思退自以失計誤國。遷延懼不敢行。俾存中等先往。而徐抗章辭以母老求去。上不之許。又乞召陳康伯判紹興府。令先赴闕。康伯六上章懇辭不起。降詔。朕祇奉慈訓。嗣有不基。永念祖宗陵寢。朝獻路絕。黎元塗炭。屯戍未休。朕爲人子而不能雪上世之恥。爲人君而不能拯斯民之危。寢不安枕。未嘗以尊位爲樂也。特以戰爭之後。肝腦塗地。不忍南北之民。枉罹非命。

自卽位以來。兩發聘使。冀尋舊盟。而鄰帥主兵。及境不納。迨行人再往。始則立式邀求。繼則追囚困辱。朕以兵隙難開。隱忍自屈。仍遣魏杞銜命復行。不較禮儀。書辭屢易。不愛四郡。割以奉之。乃渝元約。又求商秦。且索臨陣係虜之人。是更變無厭。必欲尋釁。初無休兵繼體之意。今使命逗遛。議論不決。積粟出船。包藏罔測。朕以太上聖意。不敢重違。而宰輔羣臣。前後屢請。已盡依初式。再換國書。歲幣土疆。亦如其議。在我可從。一無顧惜。若彼堅欲商秦之地。俘降之人。則朕有以國敵斷不可從也。儻或不諧前好。至於交兵。天實臨之。非朕得已。想彼兵民。厭其黷武。亦當嗟怨。況我將校六師。受國家爵祿之大。忠義所激。自應奮勇捐軀。爲國家雪恥。夫立非常之事。彰無窮之名。釀賞厚賜。朕不敢吝。嗚呼。兵凶器也。朕無德以修二國之睦。又無威以寢敵人之謀。時當三冬。而使軍士有暴露之歎。人民有轉輸之勞。害貽爾衆。痛在朕躬。凡百臣子。當念興師動衆。非朕本心。彼曲我直。動則有辭。共輸報國之忠。永享安居之樂。故茲詔示。想宜知悉。十一月初三日。虜帥率步騎數萬。分兩路南寇。一自渦口結筏。攻濠州。陷之。一自清河渡船。攻楚州。陷之。魏勝戰死。勝方陷圍。而都統劉寶。按兵不動。及督府促令應援。又以會兵爲名。退屯揚州。勝孤軍無援。遂冒圍決戰。矢中左目。身被數刃。猶奮擊不已。且戒左右曰。我死在頃刻。進退所不免。今日當力破此賊。以報國。汝等若有功。富貴立可取。吾亦瞑目無恨矣。丁寧告戒。士殊死鬪。殺賊數千。仆於陣。衆遂潰。盱眙。廬滁相繼失守。詔贈勝承宣使。仍優加褒恤。初七日。陳康伯復以疾辭。詔中使諭起之。康伯乞候疾愈。日起發赴闕。初八日。湯思退罷都督軍馬。以參政王之望。爲督視江淮軍馬。戶部侍郎李若川。參贊軍事。始

思退欲和速成也。盡取張浚備禦之具，廢弛之。因是大拂軍情。及除督軍，遷延兩月不行。卒辭避之。遂諷諫官尹檣入疏，以之望代己。而之望始與思退實相表裏。又嘗妄奏張浚措畫乖謬。及爲宣諭日，劾罷邵宏淵。深爲諸軍切齒。故尤憚此行。至是命下，遂與思退交詈朝堂。之望詰思退曰：丞相除都督，命下兩月，顧望不行。今事急，卻推之望去。如此則是丞相平時止要享堂食，急處求自脫耳。語未絕，繼之以泣。遠近聞之，莫不嗤鄙。初十日，思退持疏榻前，哀鳴求引去。遂以觀文殿大學士提舉江州太平興國宮罷。十一月，用言者落職鐫爵。永州居住。十二日，太學生數十人伏闕上書，乞斬湯思退。王之望、尹檣仍目之爲三賊。臣寮奏乞行禁止，御批如有陳獻不經，檢鼓院輒行伏闕之人，爲首者重寘憲典。餘人次第編配。事在必行。仍令三省曉諭。尹檣上疏自辯，仍丐致仕，不允。王之望乞往江淮犒師，從之。十三日，賊犯光州。虜帥遣騎數千，營於桐城北。分兵襲奪險隘。成方帥衆爭之。部將段安晨至舒城，與賊遇，合戰。自巳至午，敗之。賊遂斂衆據瓦梁等處，增脩山水寨，以自固。時遣游騎窺伺攻掠。十四日，都督楊存中退屯瓜洲，命劉寶守揚州。郭振守眞州。王彥守和州。成方守舒州。連營樹柵，列屯數十，相望以拒。十五日，郭振會諸將兵數千，分路夜斫賊營，斬級千餘。降者稱是。賊稍引卻。虜帥旣以越淮下數城，緣兵小糧乏，未敢輕肆。遂乞之懷忠。懷忠旣與志寧交隙，輒沮撓不與。志寧遂請於襄。且云：江南指日可下，止候兵糧之足，便當長驅而渡。襄復不之許。志寧請之愈力。襄遣人諭之曰：昨岐王圖畫累年，興師百萬，尙不克濟。今汝以數萬衆，欲求得志難矣。果若江南可下，聽汝自取之。我更當割河南地與若。自守萬一失利而退，我定不汝納。已遣

兵河上把截。有一人一騎敢過者，悉皆斬之。志寧既所請不獲，遂簽河南民兵，又皆不應。自顧兵少，不能肆志。遂復移文樞密院，請各退，復講和好。仍欲得盧仲賢、胡昉奉使，時知和議首尾使臣二名。至軍前，詔遣王忬借承節郎往。十六日降旨，虜帥移書執政，復欲議和。朕以生靈之故，不憚屈己，苟可以休息兵民者，一無所吝。而虜情變詐，意有包藏。遣使在途，與師壓境，侵擾淮甸。虔劉吏民，曲直甚明。神人共憤，朕當擇日親師。所過務從節省。十七日，陳康伯拜左僕射兼樞密使，進封魯國公。仍催促疾速起發。赴闕。十九日，詔左諫議大夫尹穡往浙東，權兵部侍郎胡銓往浙西，各措置海船，坐以家屬行，並放罷。二十一日，參政王之望往江淮犒師。湯思退行至處州，中風疾，死於靈山寺。詔許其喪歸葬。二十四日，王彥克復廬州。二十五日，錢端禮賜同進士出身。除簽書樞密院事。虞允文除同簽書樞密院事兼權參知政事。郭振遷奉國軍承宣使。劉寶謫授果州團練副使。瓊州安置。韓璉編管賀州。頓遇刺配吉陽軍。孔福斬於市。寶之屯楚州也。賊自清河入寇。魏勝與之力戰。寶按兵不救。陷勝以死。既自戰，又臨敵退師。棄楚州。陷之。璉守廬州。賊未及城。先望風走。福始者將二千人守濠州。賊止遣游騎數十，涉淮覘候。福擁衆閉城。縱賊筏橋南渡。昨已削奪在身官爵。令白身自效。俾頓代之。至是再遇賊。又皆不戰而退。故有是命。唯郭振守六合。與賊相距踰月。屢戰克捷。故賊不得東。卒全真揚者。振之力也。二十七日降詔。今月二十九日冬至。有事於南郊。屬邊事有警。改用明年四月零祭。是日王忬等入虜界。二十八日，吳璘將張光潛軍出大散關。夜攻賊營。斬首數百級。盡焚其積聚。閏月一日，左僕射陳康伯到闕。初三日，赴都省視事。初四日，賊自海州

運餉載兵二千進攻通秦州李寶敗之於草湖口先是官軍於湖水淺處盡樹暗柵築長堤圍之至是決其堤水賊船皆著柵上寶率衆乘之俘獲殆盡初五日郭振與賊戰於六合敗之時王忬已過界虜帥既許約和遂收兵北歸所陷城邑尋收復之十八日沈介起復知鄂州兼京西湖北制置使韓仲通召赴闕十九日參政周葵以資政殿學士參政王之望以顯謨閣學士並提舉江州太平興國宮罷二十一日王忬自虜界還忬等於閏月一日見僞帥於潁濱與之定約並用先朝與契丹澶淵盟誓舊禮書題稱爲叔姪彼此不還叛亡歲幣減十萬之數地界如紹興之時至是還奏詔遣魏杞康謂充通問和好使副往焉十二月一日錢端禮參知政事虞允文同知樞密院事王剛中簽書樞密院事並兼權參知政事十三日魏杞等入虜界十四日德音曲赦楚滁濠廬光州盱眙光化軍十六日降詔所有來年四月雩祭改用正月一日上辛祀南郊乾道元年正月一日有事於南郊肆赦改元十八日都督楊存中還闕十九日中書舍人洪适借翰林學士知制誥知開門事龍大淵借寧國軍承宣使充賀大金生辰使副入虜界二十六日江淮都督楊存中以寧遠昭慶軍節度使醴泉觀使奉朝請川陝都督吳玠依舊少師奉國軍節度使判興州並罷都督軍馬二十八日左僕射陳康伯薨輟朝贈太師三月初三日魏杞康謂使虜還廷見奏金人待遇使人禮甚厚特令升法從班上又差監察御史一員視供帳廚傳以示殊異杞又云虜主與甚寬和每言及太上皇帝必起立且言兩國幸已結好當彼此守之勿渝今我與皇帝旣爲叔姪上皇卽吾兄也願永以兄事之杞曰此南北生靈萬世之福也及辭還撫勞甚渥云嘗卽遣報使往矣十八日虞允

文參知政事。王剛中同知樞密院事。二十一日，大金遣驃騎將軍殿前左副都檢點侍衛親軍都揮指使完顏仲翰林直學士大夫知制誥兼祕書省著作郎楊伯雄充報問和好使副，入界詔刑部侍郎李若川知關門事。張說接伴。四月九日，入國門以商議禮數未定，未肯朝見。蓋昔持國書，皇帝下御榻親受之。然後付通事舍人啓緘，今議止，令通事舍人受之，發緘以進。故仲等堅持不可。若川諭曰：昔本朝不得已臣事貴朝，故禮有加。今既爲敵國，豈得復循舊禮？仲曰：今雖非君臣，要是叔姪耳，亦宜加禮，相與辯論，十餘日不決。以太上皇帝命，令皇子鄧王受書以進。於是始從。二十三日，廷見，既受書，鄧王、皇帝坐而御之，仲等不悅，頗多慢言。參政虞允文與之交論榻前，聲色殊厲，上怒，將留不遣。太上皇不可，羣臣皆謂兵燹未易開，姑已之。二十九日，引辭，所勞遣禮物，比舊禮例差損。仲等堅留館中不去，必欲得如舊數。既與之始行，然虜主褻粵自得謀脩好，每使命至，必待以甘言厚禮，惟恐和之不就，而其羣下非所願也。故仲等敢肆傲慢者，正欲害其成耳。和議既畢，自後行事不復具載。

右中興禦侮錄二卷。宋無名氏撰。案是書四庫提要著錄。附存目中。無中興兩字。謂紀宋南渡後與金人
構兵及和議之事。卽是書也。於紹興三十二年。金海陵南侵。及孝宗初年。張浚出師撓敗。始末獨詳。然虞
允文實中興名相。且有戰功。而於允文犒師至采石。道遇亂兵。命官軍力戰。大破之。且再敗亮師。復還京
口。脩戰備等事蹟。均未之及。又符離之敗。實南渡盛衰全局所關。於李顯忠力却金兵。邵宏淵按兵不動。
師至符離。遂大潰。張魏公甘寢晏然。稱是心學等語。亦未之及。則亦未足傳信。然古今野史。傳聞異詞。原
不必意爲軒輊。是在讀史者折衷之耳。厲樊榭等南宋雜事詩。引用書目。於南渡野史。搜羅略備。而襄陽
守城錄。與是書均未見。殆亦罕觀之帙。此亡友黃石溪明經鈔存本。亟付剞劂。以廣其傳。其於魏杞使回
和議。復成以後。事不復載。殆附於絕筆之義。噫。古來中外交爭。戰和異議。一時事勢。原各有是非。獨南宋
與金。則決不可和。乃秦檜則竟主和議矣。湯思退實秦檜替人。心摹手追。卽壽皇亦積重難返。而謂張魏
公。胡澹菴。王梅溪諸君子。能沮之哉。又況陳康伯。周葵等。從而附和之也。咸豐甲寅閏七夕。令節。南海伍
崇曜跋。



三十年四月五日
談書店

編主五雲王

編初成集書叢

種一他其及錄薪泣已辛

中華民國二十八年十二月初版

G 一八九九上

港京

發行人

王 雲
長沙南正路
五

印刷所

商務印書館

發行所

商務印書館
各埠

(本書校對者 毛鵬基 胡達聰)



13
4
3895